



hunn eis doropshi matgedeelt, dass et kee Problem mam Akraaftriede vum Gesetz géif ginn, well et sech jo ëm eng steierlech Moosnam en faveur vun deene betraffene Contribuablé géif handeln, an do spilt de Prinzip vun der Retroaktivitéit net am selwechte Mooss.

Dat ass alles, wat mir an der Kommissioun zu dësem Projet de loi mateneen diskutéiert hunn, deen och net weider zu Froen Ulass ginn huet, sou dass d'Kommissioun unanime de Rapport gestëmmt huet, an datselwecht géif ech eis Chamber dann och bieden ze maachen.

Ech soen lech Merci.

► **Plusieurs voix.** - Très bien!

► **M. le Président.** - Merci dem Här Rapporteur Michel Wolter. Als éischten age-drone Riedner huet den Här Meisch d'Wuert.

Discussion générale

► **M. Claude Meisch (DP).** - De Rapporteur, de Michel Wolter, war esou komplett, datt do näischt méi brauch drugehaangen ze ginn. Ech wëll him duerfir Merci soen a mech der Hoffnunguschléissen, datt déi positiv Effete fir d'Finanzplaz sech dann och wierklech déi nächste Jore bemierkbar maachen.

Merci.

► **M. le Président.** - Den Här Braz a Ver- triedung vum Här Bausch huet d'Wuert.

► **M. Félix Braz (déi gréng), remplaçant M. François Bausch.** - Merci, Här President. Ech wëll och d'Zoustëmmung vun der grénger Frak- tioun, wéi an der Kommissioun schon, sou och hei an der Plénière elo bréngen, wëll awer just eng Fro och un d'Adress vum Minister stellen, nämlech déi, wat dëst Gesetz bis elo fir Lëtzebuerg bruecht huet.

Ass et en Instrument, wat d'Erwaardungen er- fëllt huet, déi an dat Instrument gestach gi sinn, wou mer et agefouert hunn? Kënnt Der et eventuell och chiffrieren, wat et vu Recetté fir Lëtzebuerg generéiert huet, oder ass dat esou net ze maachen? Mä et wär wichteg fir eis, och ze wëssen, wat de reellen Impakt vun deem neien Instrument do bis elo zu Lëtzebuerg war.

► **M. le Président.** - Da kritt nach d'Wuert den Här Serge Urbany.

► **M. Serge Urbany (déi Lénk).** - Merci, Här President. Ech wëll awer zwee, dräi Sätz heizou soen. Duerfir geet et relativ schlecht vu menger Plaz. Ech wëll nämlech net hei mäin Accord derzou ginn. Ech wëll begrënnen, firwat ech hei dergéint sinn.

Et ass jo scho virdru vum Rapporteur gesot ginn, et handelt sech hei ëm am Fong geholl eng Verwaltungsgesellschaft vum Verméige vu Leit, déi vill Suen hunn. Déi Gesellschaft ass komplett steuerbefreit. Si beziele keng Gewer- besteier, keng Akommessteuer, keng Verméi- genssteuer, just d'Taxe d'abonnement, déi jo, wéi mer bei de Budgetsdebatte gesinn hunn, ridicule niddreg ass. Et gëtt just een Euro erhuewen op 14.000 Euro Gewënn.

Och wann et sech hei un der Surface gekuckt handelt ëm eng Gläichstellung vun den Inves- tissementer am Ausland mat deenen am Inland, handelt et sech awer virun allem ëm eng Erof- setzung, ëm eng weider Erofsetzung vun de Steieren op Gewënner. An dat an engem sym- bolträchtigen Zusammenhang: Mir hu viru fënnef Deeg hei d'Indexmanipulatioun be- schloss; mir schwätzen iwwer eng Scholde- brems an iwwer en Zréckféiere vun de sozialen Ausgabe vum Stat, an hei reduzéiere mer d'Steiere fir déi räich Leit - fir et emol eng Kéier vereinfacht duerstellen!

Et ass och dat, wat d'Chambre des Fonction- naires et Employés publics ervirgehuewen huet. Ech wëll just ee Saz zitieren aus hirem Avis: «En raison de l'endettement public toujours croissant de la plupart des États européens, l'imposition des bénéfices est d'une importance capitale pour équilibrer les budgets natio- naux.».

A just dat maache mer hei net! Mir déséquil- briieren hei eisen nationale Budget, andeem mer dat Gesetz hei stëmmen. Dat ass onver- ständlech, dass mer dat maachen. Et ass net ze rechtfertigen. An et weist, a wat fir eng Sakgaass déi Politik, wéi se haut verfollegt gëtt, eis féiert. Ech wäert duerfir géint dat Gesetz hei stëmmen selbstverständlech.

► **M. le Président.** - Merci dem Här Urbany. D'Wuert kritt dann den Här Finanzminister Luc Frieden.

► **M. Luc Frieden, Ministre des Finances.** - Här President, ech hat am Fong net wëlles, zu dë- sem Projet de loi hei ze stëmmen, mä déi lescht Interventioun...

(Hilarité)

► **Une voix.** - D'Regierung stëmmt iwwer- haapt net!

► **M. Luc Frieden, Ministre des Finances.** - Ech hat net wëlles, zu dësem Projet de loi hei ze schwätzen, mä déi lescht Interventioun grad wéi déi Froe vu virdrun, déi bréinge mech der- zou, awer hei mussen e bësse mat Kappreëse Stellung ze huelen.

Mir liewen an engem Land - muss ech der Chamber dat rappeléieren? -, wat zu 38% vu sengem Bruttoinlandsprodukt vun de Finanz- déngschtleeschunge vum Finanzsektor leeft. Elo kann een dat alles ofschaffen. Da weess ech net, wat amplaz kënnt! Dat sinn Dausenden an Dausende vun Aarbechtsplazen. An déi Aktivi- téiten, vun deene mer hei schwätzen, d'Société de gestion de patrimoine familial ass en fait näischt aneschtters wéi dat, wat mer virdrun ha- ten duerch d'Holdingsgesetz, wat vun 1929 war, wat den Ufank war vun der Entwécklung vu ganz villen Aktivitéiten hei zu Lëtzebuerg an déi eise Land an Zäiten, déi an der Stolindus- trie schwéiere waren, an Zäiten, wou mer nei Aktivitéite gesicht hunn, enorm vill bruecht hunn.

Hei schafe mer net eng Steier of. Hei hu mer fir Entreprises, fir Gesellschaften, déi Participatiou- nen an anere Gesellschaften hunn, déi mer virun e puer Joer agefouert hunn, als Ersatz fir d'Holding '29, déi do huet missen ofgeschaf ginn aus verschiddenen internationale Grënn, hu mer eng nei Struktur an d'Wee gesat. An et ass déi Struktur, déi mer hei bäibehalen.

Ech ka leider dem Här Braz net genee d'Zuel soe vun deene Gesellschaften. Ech kann dat awer gären noféieren. Mä dat Instrument gëtt vill gebraucht, eben als Ersatz vun der fréierer Holdinggesellschaft, fir eng ganz Rei vu Partici- patiounen, déi an anere Gesellschafte gehale ginn.

Déi eenzeg Ännerung, déi mer hei maachen - an ech soen dem honorabelen Här Wolter Merci, deen dat hei erkläert huet -, ass just beim Kritär, dee mer agesat hate par rapport zu Dividenden, déi aus anere Länner kommen an engem gewëssene Steierregime ënnerleien, wou d'Kommissioun der Meinung war, datt dat net kompatibel war mam europäesche Recht.

Et ass also eng minimal Ännerung, déi mer aus europäesche Rechtsgrënn maachen, an net, fir hei iergendengem e Steiercadeau ze maachen. Ech hätt gären, datt mer zu Lëtzebuerg och weider kënne Finanzaktivitéiten entwéckelen. An ee vun den Atouté vu Lëtzebuerg ass, niewent senger Stabilitéit a senger Previsibili- téit, datt mer legal Strukturen hunn, fir Finanz- aktivitéite souwuel am Privatbanking wéi am Fongebereich kënne ze strukturéieren. An dat hei ass esou eng, an ech hoffen, datt mer der nach vill kënne derbäisetzen an datt och wei- der zu Lëtzebuerg Aarbechtsplaze kënne ge- schaf ginn. A vun deene Steieren, vun deenen Aarbechtsplaze kënne mer domadder hei am Land vill Politike maachen, déi mer am Budget a bei anere Geleeënheeten diskutéieren.

Duerfir soen ech der Chamber Merci, oder all deenen, déi dëst Gesetz wëllen de Mëtteg hei stëmmen.

Merci.

► **Une voix.** - Très bien!

► **M. le Président.** - Merci dem Här Finanz- minister. Domat...

► **M. Serge Urbany (déi Lénk).** - Ech wëll awer nach eppes dozou soen.

(Interruptions)

► **M. le Président.** - Här Urbany, ech mengen, mir hunn awer elo keng Diskussioun. Ech hunn lech virdrun iwwer eng Minutt méi laang schwätze gelooss an ech mengen, mir kommen elo zum Vote iwwert de Projet de loi.

► **M. Serge Urbany (déi Lénk).** - An et gëtt mir also verweigert hei, d'Parole après ministre ze maachen?

(Brouhaha)

Abee jo!

► **M. le Président.** - Mir stëmmen elo iwwert de Projet of.

Vote sur l'ensemble du projet de loi 6305 et dispense du second vote constitutionnel

D'Ofstëmme fänkt un. Fir d'Éischt déi per- sönlech Stëmmen. De Vote par procuration. De Vote ass ofgeschloss.

De Projet de loi 6305 ass ugehall mat 59 Jo- Stëmmen, géint eng Nee-Stëmm.

Ont voté oui: Mmes Diane Adehm, Sylvie Andrich- Duval, Nancy Arendt, MM. Fernand Boden, Lu- cien Clement, Mme Christine Doerner, MM. Emile Eicher, Félix Eischen, Mme Marie-Josée Frank, MM. Léon Gloden, Norbert Hauptert, Ali Kaes,

Marc Lies (par Mme Nancy Arendt), Mme Mar- tine Mergen (par M. Marcel Oberweis), MM. Paul-Henri Meyers, Laurent Mosar, Marcel Ober- weis, Gilles Roth, Jean-Paul Schaaf, Mme Tessy Scholtes, MM. Marc Spautz, Robert Weber (par M. Raymond Weydert), Lucien Weiler, Raymond Weydert, Serge Wilmes et Michel Wolter;

MM. Marc Angel, Alex Bodry, Mme Claudia Dall'Agnol, MM. Fernand Diederich, Georges En- gel, Ben Fayot, Claude Haagen, Jean-Pierre Klein, Lucien Lux, Mme Lydia Mutsch, MM. Roger Negri, Ben Scheuer et Mme Vera Spautz;

MM. André Bauler, Eugène Berger, Xavier Bettel, Mme Anne Brasseur (par M. Xavier Bettel), MM. Fernand Etgen, Paul Helminger, Claude Meisch, Mme Lydie Polfer et M. Carlo Wagner;

MM. Claude Adam, François Bausch (par M. Félix Braz), Félix Braz, Camille Gira, Henri Kox, Mmes Josée Lorsché et Viviane Loschetter (par M. Ca- mille Gira);

MM. Jean Colombero, Gast Gibéryen, Jacques- Yves Henckes et Fernand Kartheiser.

A voté non: M. Serge Urbany.

Gëtt d'Chamber d'Dispens vum zweete Vote constitutionnel?

(Assentiment)

Et ass also esou décidéiert.

Eisen nächste Punkt um Ordre du jour ass de Projet de loi 6355 iwwert d'TVA. Hei ass d'Rie- dezäit nom Basismodell festgeluecht. Et huet sech bis elo just ageschriwwen: den Här Meisch. D'Wuert huet elo de Rapporteur vum Projet de loi, den honorabelen Här Norbert Hauptert. Här Hauptert, Dir hutt d'Wuert.

5. 6355 - Projet de loi modifiant la loi modifiée du 12 février 1979 concernant la taxe sur la valeur ajoutée

Rapport de la Commission des Finances et du Budget

► **M. Norbert Hauptert (CSV), rapporteur.** - Merci, Här President. Dir Dammen an Dir Hären, de Projet 6355 gesäit dräi Ännerungen an eiser Gesetzgebung iwwert d'TVA vir, Änne- rungen, déi sech bei der praktescher Applika- tioun vun den EU-Direktiven a -reglementer als noutwendeg erweisen hunn.

Eng éischt Ännerung betrëfft eng Prezisioun vum Gesetz, weini d'Verwaltung engem Opéra- teur d'TVA-Nummer entzéie kann. D'EU-Regle- ment vum 7. Oktober 2010 gesäit nämlech vir, datt vum Januar 2012, dat heescht vun dësem 1. Januar un, d'Identifikationsnummere vun den Opérateuren, déi hir wirtschaftlech Aktivi- téiten agestallt hunn, aus dem elektronischen Identifikatiounssystem, deen am grenziwwer- schreidenden Austausch vun Informatiounen am Kader vun enger gesamteuropäescher Bekämpfung vun Steierbedruch konsultéiert ka ginn, datt déi do eraus musse geholl ginn. Well eist TVAs-Gesetz net preziséiert, ënner welche Konditiounen een Opérateur seng TVA-Num- mer verléiere kann, muss den Artikel 4 vum Ge- setz amendéiert ginn.

Eng zweet Ännerung soll eng duebel Besteie- rung op den Transportservicer, déi ausserhalb vun der Europäescher Union gelescht ginn, verhéieren. Den Artikel 17 Paragraph 1. b) vum TVAs-Gesetz gesäit nämlech vir - sou wéi et iwwregens an der EU-Direktiv och virge- schriwwen ass -, datt déi Déngschtleeschtung- en do besteiert ginn, wou de Préstataire eta- bléiert ass. Am Kloertext wëll dat heeschen, datt e Lëtzeburger Transporteur op sengen Transporten, déi en tëschent - zum Beispill - dem Katar a Saudi-Arabien mécht, hei zu Lëtze- buerg d'TVA deklaréieren an och bezuele muss.

Dëst kann zu enger duebeler Besteuerung féie- ren, wann deen Transporteur d'TVA en amont net komplett kann offéieren, well en och nach an dem Katar oder a Saudi-Arabien eng Import- tax oder eng Tax um Émsaz bezuele muss.

Déi europäesch Direktiv 2006/112 gëtt d'Méig- lechkeet, datt an esou Fäll d'Prestatioun do be- steiert gëtt, wou se tatsächlech gelescht gëtt, dat heescht an eise Fall, an engem vun deenen zwee genannte Länner. Fir des Kann- Méiglecheet an eist Gesetz ze transposéieren, proposéiert de Projet, den Artikel 17 Paragraph 2 vum TVAs-Gesetz ze kompletéieren.

Eng drëtt Ännerung ass eng reng Formsaa- ch. Se gesäit nämlech vir, am Artikel 17 Paragraph 2 d'Expressioun „et“ duerch „ou“ ze ersetzen, fir datt den Text konform zu der Direktiv gëtt.

D'Beruffschamberen an de Statsrot hunn en Avis favorable zum Projet ofginn. De Statsrot proposéiert eng redaktionell Ännerung, fir d'Ex- pressioun „Communauté“ duerch „Union européenne“ ze ersetzen, an dat am Zesum- menhang mam neien EU-Vertrag vu Lissabon.

D'Budgets- an d'Finanzkommissioun, en accord mat der Regierung, ass awer der Meinung, datt esou eng Ännerung d'Kohärenz vum TVAs- Gesetz, an deem iwwerall vun „Communauté“ Rieds geet, affectéiere géif. D'Kommissioun huet dofir proposéiert, den Text esou ze loos- sen, wéi e vun der Regierung virgeschloe gouf. D'Kommissioun huet mäi Rapport unanime ap- prouvéiert a schléit der Chamber vir, den Text esou ze stëmmen, wéi en am Rapport virläit.

Ech bréngen domat den Accord vun eiser Frak- tioun a soen lech Merci.

► **M. le Président.** - Merci dem Här Hauptert. Et ass kee Riedner méi entre-temps ageschriwwen. Ech ginn dervun aus, datt d'Re- gierung och net méi wëllt intervenéieren. Do- madder wär d'Diskussioun ofgeschloss a mir kommen zur Ofstëmmung iwwert de Projet.

Vote sur l'ensemble du projet de loi 6355 et dispense du second vote constitutionnel

D'Ofstëmme fänkt un. Fir d'Éischt déi per- sönlech Stëmmen. De Vote par procuration. De Vote ass ofgeschloss.

De Projet de loi 6355 ass ugehall mat 58 Jo- Stëmmen.

Résultat définitif après redressement: le projet de loi 6355 est adopté à l'unanimité des 60 votants.

Ont voté oui: Mmes Diane Adehm, Sylvie Andrich- Duval, Nancy Arendt, MM. Fernand Boden, Lu- cien Clement, Mme Christine Doerner, MM. Emile Eicher, Félix Eischen, Mme Marie-Josée Frank, MM. Léon Gloden, Norbert Hauptert, Ali Kaes, Marc Lies (par Mme Nancy Arendt), Mme Mar- tine Mergen (par M. Raymond Weydert), MM. Paul-Henri Meyers, Laurent Mosar, Marcel Ober- weis, Gilles Roth, Jean-Paul Schaaf, Mme Tessy Scholtes, MM. Marc Spautz, Robert Weber (par Mme Christine Doerner), Lucien Weiler, Raymond Weydert, Serge Wilmes et Michel Wolter;

MM. Marc Angel, Alex Bodry, Mme Claudia Dall'Agnol, MM. Fernand Diederich, Georges En- gel, Ben Fayot, Claude Haagen, Jean-Pierre Klein, Lucien Lux, Mme Lydia Mutsch, MM. Roger Negri, Ben Scheuer et Mme Vera Spautz;

MM. André Bauler (par M. Carlo Wagner), Eugène Berger, Xavier Bettel, Mme Anne Brasseur (par M. Xavier Bettel), MM. Fernand Etgen, Paul Helmin- ger, Claude Meisch, Mme Lydie Polfer et M. Carlo Wagner;

MM. Claude Adam, François Bausch (par M. Ca- mille Gira), Félix Braz, Camille Gira, Henri Kox, Mmes Josée Lorsché et Viviane Loschetter (par M. Henri Kox);

MM. Jean Colombero, Gast Gibéryen, Jacques- Yves Henckes et Fernand Kartheiser;

M. Serge Urbany.

Gëtt d'Chamber d'Dispens vum zweete Vote constitutionnel?

(Assentiment)

Dann ass dat esou décidéiert.

Als leschte Projet de loi hu mer elo de Projet de loi 6288 iwwert den Offall. Hei ass d'Riedezäit nom Modell 1 festgeluecht, an et hu sech bis elo ageschriwwen: déi Häre Berger, Negri, Gira a Gibéryen. D'Wuert huet elo de Rapporteur vum Projet de loi, den honorabelen Här Marcel Oberweis. Här Oberweis, Dir hutt d'Wuert.

6. 6288 - Projet de loi relative à la gestion des déchets et modifiant

1. la loi du 31 mai 1999 portant ins- titution d'un fonds pour la protec- tion de l'environnement;

2. la loi du 25 mars 2005 relative au fonctionnement et au financement de l'action SuperDrecksKëscht;

3. la loi du 19 décembre 2008 a) re- lative aux piles et accumulateurs ainsi qu'aux déchets de piles et d'ac- cumulateurs b) modifiant la loi mo- difiée du 17 juin 1994 relative à la prévention et à la gestion des dé- chets;

4. la loi du 24 mai 2011 relative aux services dans le marché intérieur

Rapport de la Commission du Dévelop- pement durable

► **M. Marcel Oberweis (CSV), rapporteur.** - Här President, Dir Dammen an Dir Hären, Här Minister, dee virleiende Projet de loi behandelt d'Offallgestioun hei am Land. Mir setzen do- mat déi europäesch Direktiv 2008/98 an natio- naalt Recht ëm.

Den delegierten Nohaltegkeitsminister huet de Projet de loi an der Chamber de 25. Mee d'lescht Joer déposéiert. D'Chambre de Com- merce huet hiren Avis den 22. August, d'Cham-



bre des Salariés den 11. Oktober, d'Chambre des Métiers de 25. Oktober, de Syvicol den 21. Oktober an d'Chambre de l'Agriculture den 3. November agereecht. De Statsrot huet säin Avis den 28. Juni zougestallt: den éischten Avis complémentaire den 22. November an den zweeten Avis complémentaire de 16. Dezember.

Niewent den eelef Séancen an der Chamberskommissioun sinn de SIDEC an de Minett-Kompost besichtegt ginn. Et sinn och Visité beim SIGRE duerchgefouert ginn, bei der Super-DrecksKëscht a beim SIDOR. Et konnt ee sech ee Bild iwwert déi eenzel Aspekter vun der aktueller Offallgestioun maachen. Derniewent ass ee gewuer ginn, dass déi Responsabel um Terrain sech vill Gedanken iwwer nei Aktivitéiten an deem wichtege Beräich maachen.

Ech wëll am Ufank drop hiweisen, dass de virleiende Projet de loi no de villen Diskussiounen an der Chamberskommissioun eng ganz Rei vu wichtege Ännerungen erfuer huet. Net nëmmen hunn d'Deputéierten aus der Majoritéit an der Oppositioun vill konkret Ureegunge ginn, och d'Beruffskommunen an de Syvicol hu wichtege Elementer bäigesteiert, de Projet de loi op ville Punkten ze verbesseren.

Notamment konnt de fondéierte Bedenke vum Statsrot Rechnung gedroe ginn. Vu grousser Virdeel war awer och, dass mir op d'Wësse vum Terrain zrëckgegraff hunn. De konstruktive Geescht vun der Regierung huet dozou bäigedroen, dass Ureegungen opgegraff si ginn, esou dass mir elo een Text hunn, dee sécherlech e puer Joer d'Strooss wäert halen.

Am Beräich vun der Offallgestioun, een technesche Beräich, geet den technesche Fortschritt awer rasch virun. An dat bedéngt, dass dëst Gesetz an e puer Joer bestëmmt erëm eng Kéier ugepasst muss ginn.

Erlaabt mir op déi véier Eckpunkten anzugeen, déi de Kader vun onse laangen Diskussiounen opgespaant hunn. De Projet de loi soll hëllefen: éischstens, d'Gesondheet vun de Mënsche wéi, zweetens, d'Ëmwelt, dat heescht d'Biodiversitéit, ze protégéieren. Da soll, drëttens, de Prinzip vum Pollueur-payeur wéi och, véiertens, d'Ressourcëschounung voll zum Droe kommen. Et huet sech nämlech an de leschte Jorenerausgeschiedt, dass ëmmer méi natierlech Ressourcen aus dem Buedem erausgerappt ginn an domat d'Reserve permanent méi kleng ginn a mir eisen Nokommen ëmmer manner loossen.

D'Europäesch Unioun ass net midd ginn, en Appell un d'Memberlänner ze lancéieren, derfir ze suergen, dass den Offall vun deem enge Bierger oder Betrib e Wäertstoff fir een anere Bierger oder Betrib duerstellt. Dat heescht, mir müssen d'Kreislafwirtschaft konsequent opbauen.

Si huet och d'Reiefolleg vun de fënnf Mesurë fir eng optimal Offallpolitik opgestallt. Dat sinn:

éischstens, d'Preventioun. Dat heescht, iwwerhaupt keen Offall ze produzéieren;

zweetens, d'Virbereedung fir de Réemploi;

drëttens, de Recycling;

véiertens, déi energetesch Valorisation iwwert de Wee vun dem Biogas oder der Produktioun vu Wäermt an elektrescher Energie;

a fënneftens, d'Eliminatioun op enger kontrolléierter Décharge.

D'Offallpolitik am leschte Jorhonnert bis haut huet fundamental Verännerungen erlieft. Bis zur Mëtt vun leschte Jorhonnert hate mir vill sougenannte wëll Dreckstippen no bei den Uertschaften. Déi hunn dacks gebrannt a gëfteg Gase fräigesat. Dunn ass et zum Ëmdenke komm. D'Mënsche si sech bewosst ginn, welch Gefore vun dësen Drecksschleideren ausginn, an de Gedanken ëm de Schutz vun eiser Ëmwelt an Natur huet méi ee grousser Stellenwäert kritt. Doropshi sinn déi Dreckstippen zougemaach ginn.

Déi éischt europäesch Direktiven hunn d'Richtung virginn, mat deenen déi national Offallgestioun verbessert gouf. Begrëffer wéi Recycling, Kreislafwirtschaft, Wäertstoff an energetesch Notzung koumen an de Sproochgebrauch. Déi europäesch Offallpolitik ass awer net stoe bliwwen. Si huet sech konsequent fir de Prinzip vum Pollueur-payeur agesat a si wollt d'Ressourcennotzung optimiséieren.

Mir stellen haut fest, dass de Wuesstum ëmmer manner natierlech Ressourcë verbraucht. Dat heescht, et kënn zu enger seriöser Ressourceneffizienz. Doderch kënnen finanziell déi Mëttelel agespuert ginn, déi sécherlech fir aner Zwecker besser gebraucht ginn.

E wichtege Punkt vun dem neien Offallgesetz sinn d'Informatiounen, déi un d'Bierger an d'Betriben bruecht mussen ginn. Hei sinn d'Gemengen, mä och d'Ëmweltverwaltung gefuerdert.

Wat elo d'Preventioun vun der Produktioun vum Offall ubelaangt, esou ass et kloer, dass an

der Kette vum Produzent iwwert den Händler zum Verbraucher eng méi grouss Sensibiliséierung gemaach muss ginn. Mat de groussherzogleche Reglementer ginn déi néideg Mesuren ergraff.

Besonnenesch bei der Valorisation vun den Offäll wëll ech nëmmen déi wichtege Elementer ervirsträichen. Et muss derfir gesuergt ginn, dass d'Offäll getrennt gesammelt ginn, esou wäit dat aus techneschen, ökologeschen a wirtschaftleche Gesichtspunkten ze maachen ass. Dat heescht konkret awer: Mir müssen derfir suergen, dass et net zu enger Vermeschung vun den Offallkomponenten oder -fraktiounen kënn - eng wichtege Roll vun der Erzéiung an der Sensibiliséierung!

D'Gestioun vum Offall ass eng wichtege Aufgab an de Gemengen. Well si dës Aufgab awer net eleng meeschtere kënnen, huet se sech an der Vergaangenheet a véier, duerno an dräi Gemengesyndikater zesummegeeschloss: de SIDEC, de SIGRE an de SIDOR. Kuerz nach eng Kéier rappeléiert: De SIGRE an de SIDEC lagen den Offall aus de Gemengen op kontrolléierten Déchargen, an de SIDOR verbrennt den Offall an enger Müllverbrennungsanlage; eng ganz nei, elo kuerz eréischt agewéit.

Am SIDOR gi pro Joer 125.000 Tonnen, am SIDEC 39.000 Tonnen an am SIGRE 29.000 Tonne verschafft. Mëttlerweil - dorop si mer stolz am Land hei - sinn eng ganz Rei vu Recyclingcenteren a Recyclinghäff geschaf ginn, wou aus dem Offall wichtege Fraktiounen fir de Recycling zrëckgeholl ginn.

An der Chamberskommissioun ass de Volet vun de Secondhandshops an de Recyclingcenteren kritesch hannerfrot ginn. Well d'Gefor besteet, dass defekt elektresch Apparater vun anere Mënsche matgeholl ginn an déi eventuell zu Schued komme këinten, ass decidéiert ginn, d'Secondhandshops net an de Recyclingcenteren zouzeloossen.

Dierf ech drop hiweisen, dass ronn 9,2 Milliounen Tonnen elektresch Apparater an der Europäescher Unioun an der Moyenne pro Joer verkaaft ginn? An do lant e groussen Deel no enger gewëssener Zäit an der Poubelle. Dësen Elektroschrott mussen mir sënnavoll recycléieren. Eleng bei eis am Land hei falen 9,3 Kilogramm Elektroschrott pro Joer a pro Awunner un.

Erlaabt mer kuerz e Gedankenexperiment mat lech duerchzuféieren. Wa mer an Afrika kucken, do gëtt vu Mënschen, also Kanner a Fraen deelweis, ënner erschreckende Bedéngungen aus enger Tonn Goldäerz ronn fënnf Gramm rengt Gold gewonnen. Dergéint awer aus enger Tonn Handyen, dat sinn 20.000 Stéck, kënnen mer 300 Gramm Gold gewinnen, dräi Kilogramm Sëlwer an honnert Gramm Koffer. Ass et dofir net schanterlech, dass an de räiche Länner Handyen agesammelt ginn a se an Afrika mat Containere bruecht ginn, wou d'Leit mat ville Geforen déi eenzel Edelmetaller erëm erausbrennen a krank ginn?

Eleng an Däitschland sinn an der Wirtschaft am Joer 2009 duerch de Recycling Käschtchen an der Héicht vun 8,5 Milliarden Euro erspuert ginn. An et sinn eng Hällewall vun dauerhaften Aarbechtsplaze geschaf ginn. Och mir kënnen dat hei am Land maachen, wa mer eis e bëssen ustrengen. Et sollen och Recyclingbourssen agefouert ginn, an dat sougutt hei am Land wéi iwwert d'Grenzen eraus.

Niewent dem Recycling gëtt et nach zwou weider Pisten. Duerch d'Ofliwwere vum Grasschnëtt an duerch d'Bäimësche vun den Offäll aus de Bauerebetriber gëtt Biogas iwwert de Wee vun der anaerober Fermentatioun an de Biogasanlage produzéiert. Mir hunn der schonn eng Rei am Land. Aus dem Biogas kann dann elektresch Energie a Wäermt produzéiert ginn. Op dësem Wee reduzéiere mir massiv eis CO₂-Emissiounen. Dat ass wuel am Sënn vum Kyoto-Protokoll.

Duerch d'Verschaffe vun dem Heckschnëtt gëtt e wäertvolle Kompost produzéiert, deen de Mënschen a distributioun gestallt gëtt. Et muss awer hei ënnerstrach ginn, dass am Beräich vun de Biooffäll kee Porte-à-porte virgesinn ass.

An de Ménagé falen an der Moyenne ronn 700 Kilogramm Offall op de Kapp am Joer un. An domat leie mir, en traurege Rekord, wäit iwwert der Moyenne europäenne, nämlech 40%. Eng vun den Ursachen ass sécherlech, dass mir eng räich Gesellschaft sinn, an do fällt ëmmerhi méi Offall wéi an enger aarmer Gesellschaft un. Derniewent awer hu mir och ronn 150.000 Grenzpendler, déi den Offall hei produzéieren an dee mir bei ons entsuerge müssen.

Duerch d'Ëmsetzung vun der europäescher Direktiv soll elo den Taux de recyclage fir déi ausgewielte Fraktiounen - Pabeier, Metaller, Glas a Plastik - op 50% bis d'Joer 2020 erhéicht ginn. Op dësem Wee wëlle mir déi gewënschte ressourcëschounend Kreislafwirtschaft weider ausbauen.

Haut gëtt et Gemengen, wou dësen Taux schonn iwwer 65% läit, awer och Gemenge mat manner wéi nëmmen 30%. D'Moyenne läit bei 42%. Also nach 8% si mer amgaangen an der Moyenne. D'Syndikater SIDEC a SIDOR hunn am Joer 2008 en Taux de recyclage vun 43,4% an de SIGRE 32,4% erreecht. Mä jiddweree kann dat da bei sech doheem e bësse besser maachen, an da komme mer scho virun.

Wéi ugedeit, den Taux soll 50% bis 2020 fir déi eenzel Gemengen erreechen, oder fir e puer Gemengen, déi sech zesummeschlësse kënnen. Eng Gemeng kann awer nëmmen eemol mat deem Taux belastscht ginn. Am Laf vun de Joren ass de Prinzip vum Pollueur-payeur zu enger droender Sail vun eiser Offallgestioun ginn.

Well dat eng käschtenintensiv Operatioun ass, an dat op der gesamter Ketten - ënner anerem d'Ewechhuelen, den Transport, de Réemploi, déi energetesch Notzung an d'Verwärtung -, ass et kloer, dass dem Offallproduzent Käschtchen verrechent mussen ginn. Dat ass jo de Prinzip vum Pollueur-payeur: Wie manner Dreck mécht, muss manner bezuelen.

Déi eenzel Gemengen hu sech dofir Taxëreglementer ginn, an och déi eenzel Syndikater, fir dësem Prinzip gerecht ze ginn. Zu dësem Sujet hate mir eng breet Diskussioun an der Chamberskommissioun. Et ass dun awer festgehal ginn, dass d'Gemengentaxen esou ausgeschafft mussen ginn, dass si sech aus zwou Komponenten zesummesetze sollen: eng variabel Komponent, déi entweder d'Gewicht an de Volume oder de Volume vun dem ufalenden Haushalts-offall berücksichtegt; an eng weider variabel Komponent, déi d'Entsuerge vum Reschtstoff, den Déchets encombrants, a Rechnung stellt.

Et ass festgehal ginn, dass d'Gemengen och Offallsorte sammeln an entsuergen dierfen, déi net aus de Ménagé kommen, awer vun ähnlecher Zort sinn, mat der Oplo awer, dass dës Offäll de Volumen net dépasséieren dierfen, deen normalerweis an engem Ménagé ufält. Esou dierf et net sinn, dass eng Entreprise mat engem Camion voller Styroporplatten an de Recyclingcenter kënn an einfach dat oflagert. Dat ass net erlaabt.

Mat dem Offallgesetz vum Joer 1994 woren d'Gemengen invitéiert ginn, hir Taxen esou festzeleeën, dass se déi reell Käschtchen, déi bei der Produktioun vum Offall a vun dem assimiléierten Offall ugefall sinn, facturéieren. Dat wor sécherlech keng einfach Aufgab, well et hunn nëmmen 21 Gemengen esou een Taxëreglement ausgeschafft.

Am Syndikat SICA hu sech eng ganz Rei Gemenge beienegetéisselt, wou de Prinzip vun Weie vum Offall aus de Ménagen duerchgefouert gëtt. E gudder Wee wuelverstanen, awer och do brauch et vill Opklärungsarbecht bei de Matbierger. Dergéint hunn aner Gemengen hir Offallgestioun a Facturation iwwert d'Gréisst vun de Poubellë gemaach an hunn och do gutt Resultater opzeweisen, wéi mer dat konnt hëieren an der Chamberskommissioun.

Onofhängeg vum Asammelprozess, dee jo och e staarke regionale Charakter huet, ass festgehal ginn, dass d'Obligation de résultat dat ugestriefent Zil an der nohalteger Offallgestioun muss ginn. All Gemeng soll hire Wee do goen. Wichtege ass et op alle Fall, dass mer herno gesinn, dass mer déi ugestriefen Ziler erreechen. An dat geet sécherlech, andeem mer eis Leit dobaussen um Terrain mat invitéieren, dësse Wee ze goen.

Am Artikel 20 gëtt op d'Responsabilitéit vun de Gemengen higewisen. All Gemeng muss zwee Joer no dem Akraafttriede vun dësem virleiende Gesetz hir Reglementer an der Offallgestioun adaptéieren. Wann et net de Fall ass, da ka sechs Méint no enger Mise en demeure en Arrêté grand-ducal geholl ginn, vun deem de Gemengerot an d'Bild gesat ginn ass.

Am Zesummenhang mat den Taxen ass och drop higewisen ginn, dass munch Matbierger net à même sinn, d'Offalltax ze bezuelen. Och an enger räicher Gemeng gëtt et Problemer. Et gëtt de Gemengen erlaabt, mat engem Gemengereglement dësse Matbierger iwwert de Wee vun enger Allocation de vie chère ënnert d'Äerm ze gräifen.

Wann de Problem vun der Entsuerung bei de Privathaushalter ze komplizéiert ass, da stelle sech awer grouss Problemer mat dem Opstelle vun de sëllege Poubellë bei den Appartementshaiser. Dat war opgeworf ginn an der Chamberskommissioun. Dunn huet den Här Minister gemengt an eis matgedeelt, dass hien a senger Qualitéit als Logementsminister do nei Mesurë wëllt ergräifen, well et do wäertvoll ass, dass an dësen Appartementshaiser propper Konditiounen geschaf ginn.

Ech hunn de Sujet vun de Biooffäll an der groer Poubelle ugeschwat. Duerch eng verstärkten Opklärungsarbecht wëlle mir d'Matbierger derzou bewegen, hire Biooffall net an dës Pou-

belle ze werfen, mä am Contraire enger besserer Verwärtung zouzeféieren. Et ass nämlech festgestallt ginn an den Etüden, dass den Undeel vu Biooffall an der Poubelle ronn 39% vum Gewicht ausmécht. Vill ze héich!

Duerch ergraffe Mesurë konnt dësen Undeel an de leschte Joren a muncher Gemengen op 30% reduzéiert ginn. Et ass dofir begrëssenswäert, dass de Biooffall an de Landgemengen a ville Fäll vun de Matbierger op dem eegene Kompostkoup entsuergt gëtt. Derniewent gëtt den Heckschnëtt an och de Grasschnëtt ënner anerem op dem Fridhaff, am Muertendall oder am Minett-Kompost ofgeliewert. Do gëtt entweder Kompost hiergestallt oder eng Matière, fir déi zwou kontrolléiert Déchargen ofzedeken.

D'Europäesch Kommissioun schreift dozou awer Folgendes: All Joers ginn 90 Milliounen Tonnen lessmëttele verschwent. Dat si ronn 180 Kilogramm op de Kapp. An dobäi leiden eng Milliard Mënschen Hunger! Mä dat ass wuel en anert Kapitel.

Här President, e weidere Sujet am Projet de loi sinn déi inert Offäll, ënner anerem de Bauschutt oder de Buedem, deemno Stoffer, déi recycléiert oder awer ouni Bedenken op eng Décharge bruecht kënnen ginn. E gutt Beispill ass d'Décharge bei der Ausfahrt Helleng op der Collectrice du Sud. An deem Zesummenhang gëtt elo gesetzlech festgehalen, dass virun dem Ofraupe vun engem Immeuble en Inventaire vun de virleiende Materialien opgestallt soll ginn. Dës muss der Verwaltung zu all Moment virgeluecht kënnen ginn.

Dierf ech an deem Zesummenhang drun erënnern, dass am Joer 2009 ronn 6,7 Milliounen Tonnen Déchet-inerten ugefall sinn, déi mat engem Taux vu ronn 45% recycléiert goufen? Et sinn derniewent awer ronn 500.000 Tonnen inerten Offall iwwert d'Grenzen transportéiert ginn. Dat dierf net de Fall sinn, ausser a besonnesche Fäll.

Mir müssen nei Weeër opmaachen, ënner anerem dësen Offall zum Deel als Remblai laansch d'Autobunnen abringen. Den Här Minister huet eis dës Iwwerleeung schonn ugedeit. Vläch kann hien eis haut soen, wou mir mëttlerweil dru sinn.

Den ugestriefenen Taux de recyclage beim Bauschutt, dee muss bis 2020 op 70% eropgeschrauft ginn. Den Artikel 30 behandelt d'Ausstellung vun den Autorisatiounen fir d'Betriben, déi sech mat dem Offall ofginn, an den Artikel 32 den Enregistrement bei der zoustänneger Ëmweltverwaltung.

D'Chambre d'Agriculture huet drop higewisen, dass d'Bauerebetriben, déi déi natierlech Offallprodukter wéi Piff, Mësch oder de Ferment aus de Biogasanlagen transportéieren, net ënnert dës Enregistremensprozedur falen dierfen. An dat gouf och akzeptéiert.

Am Artikel 34 gëtt d'Féiere vun engem chronologesche Regëster...

► **M. le Président.** - Här Oberweis, Dir misst awer elo lues awer sécher zum Schluss kommen.

► **M. Marcel Oberweis (CSV), rapporteur.** - Et deet mer leed, Här President, ech hunn nach e puer Säiten an ech hunn nach e puer Saachen ze erzielen hei. Ech maachen awer ganz séier virun.

(*Interruptions diverses*)

► **M. le Président.** - Här Oberweis, Dir hutt elo bal véier Minutte schonn iwwerzunn. Ech ginn lech och nach ganz gär eng oder zwou Minutten, mä Dir musst awer iergendwéi eng Kéier zum Schluss kommen. Här Boden?

► **M. Fernand Boden (CSV).** - Här President, d'Kommissioun hat gefrot, datt de Rapporteur soll fënnf Minutte méi kréien. Dat war accordeiert gi vun der...

► **M. le Président.** - Jo, mä déi huet e scho kritt. Et waren zéng Minutten zegutt an en huet der 15 kritt.

► **M. Fernand Boden (CSV).** - En hat der 15 zegutt an en huet der fënnf kritt, a fënnf sinn der 20.

► **M. Marcel Oberweis (CSV), rapporteur.** - Ech gi mech elo drun, Här President. Mä et ass en interessanten Sujet.

► **M. le Président.** - Fuert elo emol virun, Här Oberweis!

► **M. Marcel Oberweis (CSV), rapporteur.** - Am Artikel 34 gëtt d'Féiere vun engem chronologesche Regëster vun den enregistrierte Betriben gefuerdert. Hei müssen d'Menge vun den



transportéierten Offäll an den Traitement wéi och déi eenzel Zorten an de Bestëmmungsuert festgeluecht ginn. Wéi oft den Transport duerchgefouert gouf a mat welleche Verkéiersmëttelen muss och festgehalen ginn, well nëmmen esou kann d'Verwaltung déi eenzel Taux de recyclage bestëmmen. D'Ménagé brauchen awer kee Regëster ze féieren.

Am Artikel 35 ginn och déi néideg Aussoen iwwert d'Joresrapportéi gemaach. Bis zum 30. Abrëll vum Joer duerno mussen déi enregistriert Betriber hir Rapporten ofliwweren, aus deenen all déi wichteg Elementer erauskommen. An deem Zesammenhang gëtt och op den nationale Plang fir d'Offallgestioun am Artikel 36 higewisen.

Mat deem Plang gi mir eis den Outil, fir eng nohalteg Offallgestioun duerchzuféieren. Wichteg Elementer sinn dovunner eng akribesch Kontroll vun den eenzelnen Offallfraktiounen an eng wäitreechend Informatiounspolitik fir all d'Acteuren. All d'Partner mussen derfir suergen, d'Produktioun vun Offall esou kleng wéi méiglech ze halen.

Fir vill Kappzerbrieches hunn den Artikel 47 iwwert déi stroferechtlech Aspekter an den Artikel 48 iwwert d'Avertissements taxés an der Kommissioun gesuergt. A sengen Avisen huet de Statsrot opgefuerdert, kloer Aussoen zu dese Voleten ze maachen, an dat gouf och gemaach. Ech wëll och hei op de schréffleche Rapport verweisen, well mer d'Zäit fortleeft.

Dee virleiede Projet de loi gesäit och d'Simplification administrative fir d'Betriber vir. Wat d'Ausstellung vun den Autorisatiounen oder den Agrément fir e Betrib aus dem Offallberäich ubelaangt, esou kënnen déi duerch eng eenzeg Prozedur duerchgefouert ginn, wat jo vill Zäit spueren wäert.

Fir déi Entreprises, déi Offall aus hiren eegene Betriber transportéieren, ass eng Erliichterung a puncto Enregistrement virgesinn. Bis elo duerfte si nëmme kleng Mengen transportéieren; dës Limite gëtt opgehuewen. Et gëtt drop higewisen, dass d'Bestëmmungen an d'Virschreften esou ausgeluecht musse ginn, dass d'Gesondheet vun de Mënschen an de Schutz vun der Ëmwelt déi éischt Prioritéiten duerstelen.

Den Avis vun der d'Chambre d'Agriculture hunn ech schonn erwähnt. D'Chambre de Commerce huet ganz kloer d'Ressourcenschouung erausgestrach wéi och d'Valorisation vun de Biodécheten. D'Chambre des Métiers huet op d'Tauxen higewisen, 50% a 70%, an huet eis och invitéiert, dass mer d'Trennung vun den ufalenden Déchetten nach besser sollte maachen. Si hunn och gefrot gehat, dass nach weider Installatiounen fir den Traitement vum Offall hei am Land sollte gemaach ginn, well domadder d'Kreeslafwirtschaft ënnerstëtzt soll ginn. D'Chambre des Salariés huet opmierksam gemaach, dass ee bestëmmt bei den Appartementshaiser genuch Surface sollt opstelle fir déi vill Poubellen. An de Syvicol schwätzt sech aus, dass e gär d'Réglements grand-ducaux zur Asiicht hätt.

Ech kommen zum Schluss, Här President. Wa mir déi nohalteg Entwécklung wëllen, dann ass d'Kreeslafwirtschaft an der Offallgestioun eng wichteg Viraussetzung. Eng héich Effizienz an e seriöse Ressourcenmanagement stellen d'Haapt-elementer duer. D'Matbiereger an d'Betriber, mä och d'Gemengen an de Stat sinn invitéiert, hei matzemaachen.

Zum Schluss dann, eng luewenswäert Initiativ hunn déi dräi Offallsyndikater viru Kuerzem ergraff, andeems si sech fir méi eng enk Kooperatioun setzen. Mir konnte liesen, dass si en dréiende Karussell bis 2015 opstelle wëllen, dat heescht den Offall aus dem SIGRE, dee selwer keng mechanesch-biologesch Behandlung duerchféiert, gëtt an der SIDOR verbrannt. D'Deponie vum SIEDEC ass geschwé randvoll an hiren Offall gëtt no der mechanesch-biologescher Behandlung an de SIGRE bruecht, wou en als Ofdeckungsmaterial déngt. De verbrennbare Undeel kennt dann op Leideleng.

Zum Schluss wollt ech awer alle Mataarbechter Merci soen, déi sech an deem Dossier mat mir agesat hunn an abruucht hunn. De Rapport ass an der Kommissioun eestëmmeg ugeholl ginn an ech wënsche mer hei eng breet Zoustëmmung.

Déi vun der CSV bréngen ech eran a soe Merci fir d'Nolauschteren.

► **Plusieurs voix.** - Très bien!

► **M. le Président.** - Merci dem Här Oberweis. Als éischte Riedner ass den Här Eugène Berger agedroen. Här Berger, Dir hutt d'Wuert.

Discussion générale

► **M. Eugène Berger** (DP). - Merci, Här President. Léif Kolleeginnen a Kolleegen, ech wëll ufänken, andeems ech dem Rapporteur och Merci soe fir säin ausféierlechen, leider vläicht e bësselchen ze kuerze Bericht. Hien hätt sécher nach kënnen déi eng oder déi aner Saachen derbäisoen, mä op alle Fall am schréffleche Rapport, do fanne mer wierklech en détail all d'Elementer erëm.

Ech muss och soen, dass wierklech bei der Preparatioun vun deemem Projet de loi gutt Aarbecht an der Kommissioun geleescht ginn ass. Mir hunn eis vill mat deene verschiddenen Avisé beschäftegt. Mir sinn och op den Terrain kucke gaangen, ënner anerem bei verschidden Offallsyndikater. An ech mengen, dat ass och eng richtig Démarche, wann ee Gesetzter preparéiert, fir dat ze maachen.

Ech mengen, dat neit Offallgesetz, mir hunn dat elo scho grad héieren, huet ganz vill Facetten. A wann een op all déi eenzel Detailler an Artekle geif agoen, da géif dat de Kader och vu menger Riedezeit sécher sprengen. Ech wäert mech dofir op e puer Aspekter limitéieren. Besonnesch wäert ech op déi agoen, déi méi spezifesch nei Akzenter am Beräich vum Hausmüll, vun der Offallpolitik am Beräich Hausmüll ugin.

Aganks wëllt ech awer och e puer Constaté maachen zur Situatioun hei zu Lëtzebuerg. Sécherlech hu mer hei am Land a villen Domäne vun der Offallbesäitegung an dem Recyclage e gudder respektiv en héije Standard erreecht. Dat muss een unerkennen. An dat ass awer och d'Resultat vun engem laangwierige Prozess, wou et och emol an der Vergaangenheet méi konflikträich erogaangen ass. Wann een e bësselchen méi wäit siche geet, kann een nëmmen erënneren un déi kontrovers Diskussiounen an den 80er Jore ronderëm d'Verbrennungsanlag vun der SIDOR.

Mä egal, haut steet Lëtzebuerg awer an dem Beräich vun dem Traitement an dem Recyclage vum Hausmüll besonnesch éischter gutt do, wat och vun de Statistiken beleucht gëtt. A wann dat esou ass, dann huet dat e puer Ursachen.

Ech mengen, den Ustouss vun enger effizienter Déchetspolitik ass an deene leschten 20, 30 Jore ëmmer aus Bréssel komm: Direktiven a Reglementer hunn de Wee virgezechent. An et kann ee schonns soen, dass et eng vun deene weinege Success Stories vun der EU-Politik ass, dass een déi am Beräich vun der Ëmweltpolitik insgesamt ka fannen. Dat gëllt fir d'Offallpolitik, dat gëllt fir d'Klimaschutzpolitik, wou och d'EU ëmmer Virreider war, dat gëllt fir d'Naturschutzpolitik.

Duerch déi Virgabe vu Bréssel hu mer hei zu Lëtzebuerg, mä och an aneren europäesche Länner relativ héich Standarden erreecht am Verglach mat anere Länner op der Welt, mat anere Kontinenter op der Welt. Et gëtt awer och nach Bieräicher - et sollt een elo net alles perfekt schéieren - an der Offallpolitik, wou mer hei zu Lëtzebuerg manner gutt dostinn a wou et nach eng Rei Problemer gëtt. Dorobber wäert ech méi spéit, zum Schluss och kuerz agoen.

Ech mengen, zu Lëtzebuerg hu mer dës le départ eis Hausaufgabe gemaach, déi Virgabe vu Bréssel, wat d'Offallpolitik ubelaangt, konsequent versicht ëmzesetzen. Dat ass eng Konstant, déi een déi lescht 20, 30 Jore ka feststellen. Dat ass ugaange beim Josy Barthel iwwer all déi respektiv Regierungen, all d'Ministeren, d'Statssekretären, déi ëmmer zoustänneg waren, déi hunn ëmmer gekuckt, fir sech wierklech un d'Virgabe vu Bréssel ze halen.

En anert Element, wat sécher och déi effikass Offallpolitik am Beräich vum Hausmüll besonnesch kennzechent, ass, dass mer et hei zu Lëtzebuerg faerdegbruecht hunn, dat net elo Privatacturen eleng ze iwwerloossen, mä dass mer Acteuren opgestallt hunn éischter aus dem öffentliche Beräich, déi sech an der Praxis an am Alldag ëm d'Gestioun vum Offall këmmen, an dat si virun allem déi Gemengesyndikater. Mir hu jo haut nach dräi grouss Acteuren do, déi dräi interkommunal Offallsyndikater SIDOR, SIEDEC, SIGRE, déi dann och flächendeckend d'ganz Land mat regional appropriéiert Solutiounen ofdecke respektiv do esou Solutiounen ubidden.

Här President, déi beschten Démarche am Offall ass nach ëmmer déi, fir en ze éitéieren. Dat soll nach wie vor dat iewescht Zil bleiwen. Éischt, zweet, drëtt Prioritéit soll nach ëmmer sinn: Kommt, mir versichen den Offall ze vermeiden! An et sollen also all Efforté gemaach ginn, fir deem Zil esou no wéi méiglech ze kommen.

Mä et muss een awer och soen, dass hei de Consommateur, de Konsument net deen eenzegen Acteur ass, dat net eleng kann déciéieren. Gitt emol an e Buttek oder an e Supermarché! Do gesäit een, wéi staark een do vun

de Produzenten eigentlech ofhänkt. Kaapt emol e Pak Kichelcher - an ech mengen, et gëtt der jo Honnertausend verschidden Zorten -, egal vu wat fir enger Firma!

Kaapt esou e Pak Kichelcher, dann ass all eenzelne Kichelchen an engem plastikse Pabeier an da si se nach an esou engem Dëppchen, esou an engem plastiksen Dëppchen, wou all eenzelne Kichelchen dann an engem plastiksen Dëppchen ass, ronderëm dat Ganzt ass dann esou Sëlwerpabeier. Dat ass dann an enger Kartonskëscht a ronderëm d'Kartonskëscht ass och nach wahrscheinlech e Plastikfilm. Do huet een dann also fir e Pak Kichelcher...

(Interruption)

Et fënnt een et vläicht net bei all de Kichelcher... ech versichen och, wa méiglech, d'Kichelcher beim Bäcker ze kafen. Ech schwätzen hei vu Biscuits. Neen, ech mengen, Dir wësst, wat fir eng Produiten ech mengen. Et ass och nëmmen e Beispill. Do sinn da fënnf verschidde Verpackungen, fir 100 oder 200 Gramm Kichelcher ze kafen!

Ech muss soen, dass ech och e regelméisseg Konsument sinn an de sougenannte Biobutteker. Och do muss ech leider feststellen, dass een do och ëmmer méi Produité fënnt, déi da vläicht net fënnf Verpackungen, mä och nach mindestens zwou oder dräi Verpackungen hunn, wat ech bedauern. Ech wëll nëmmen illustréieren - wann ee seet, Müll vermeiden, Verpackung vermeiden -, dass een dat jo gäre mécht, mä da muss een och als Konsument d'Chance dozou kréien. Dat kéint een also och bei villen anere Produiten esou maachen.

Ech wëll awer dann och ënnersträichen, dass d'Responsabilitéit fir d'Vermeiden also net nëmme beim Konsument läit, mä och bei de Produzenten, an dass een eigentlech och do heiansdo géif méi couragéiert Virgabe vu Bréssel erwaarden, dass déi deene Produzente géife méi op d'Fangere klappen. Wéi gesot, Offall éitéiere muss ëmmer déi éischt Devise bleiwen, mä et muss dann och dem Konsument iergendwéi méiglech gemaach ginn.

De Recyclage kann ëmmer nëmmen déi zweetbesch Optioun sinn. An déi nei Direktiv, déi setzt jo och weiderhi ganz staark dorop, fir den Offall ze revaloriséieren a fir nei Produiten dorauer ze maachen. Ech mengen, dass ass jo haut praktesch och Usus, dass een zum Beispill aus Plastikfläschen net nëmmen nei plastik Campingsstille fir op d'Terrass mécht, dass ee carrément haut scho Fleece-Jackette fir elo de Wanter aus Plastikfläsche mécht. Hei gesäit een also, dass nieft dem Ëmweltschutz beim Recyclage och aner Considératiounen an d'Spill bruecht ginn, well hei geet et dann och ëm ekonomesch Interessen.

Offall a recycléierten Offall ginn nei Produiten, déi interessant si fir d'Ekonomie, fir eng ganz Rei Industrien. D'ARBED zum Beispill, net méi d'ARBED, ArcelorMittal mécht jo haut hiert Geschäft zum groussen Deel mat Offall, mat Recyclage. Well wat maache se? Si schmölze Schrott - dat ass also Offall - zu neie Stolproduiten. Hei huet also Offall e ganz eminenten ekonomeschen Aspekt.

Bon, schliesselech gëtt och den Aspekt vun der Knappheet vun de Rohstoffe ëmmer méi wichteg. Autosindustrien - de Rapporteur huet dat och schonn erwähnt -, an der Autosindustrie zum Beispill, oder alles dat, wat an der Elektroindustrie gebraucht gëtt: Do sinn eng ganz Rei méi rar Metaller dran, déi ee brauch an déi een awer begrenzt an der Natur nëmme ka fannen. Duerfir muss een also do bei deene Produiten ëmmer méi recycléieren, fir eben dann déi Stoffe erauszehuelen, fir eben nei Handyen oder Elementer vun neien Handyen domadder ze maachen.

Här President, wann een d'Statistiken fir den Hausoffall kuckt, da gesäit een, dass op den éischte Bléck beim Hausoffall fir eist Land, dass mer do net esou gutt géifen dosto, well Lëtzebuerg produzéiert, jiddwer eenzelne Bierger, laut Statistik 700 Kilogramm pro Joer! Dat huet domadder ze din, dass mer éischter e Liewensstandard hunn am Land hei, deen héich ass, dass mer also ganz vill konsuméieren.

Op där anerer Säit gesi mer awer och - an dat ass dat Positiv -, dass mer hei zu Lëtzebuerg Champion sinn, wierklech Champion sinn am Recycléieren, mat engem Duerchschnittstaux vun 42%! Dat wëllt also heeschen, dass mer praktesch - ech gesinn elo e bësselchen méi generell - net wäit vun der Halschent ewech sinn, wat mer recycléiere vun eisem Pabeier, vun eisem Plastik, Bio-Offall an esou weider, dass mer dat also zréckbréngen an d'Filière vum Recyclage an dass mer do awer wierklech éischter dat kënnen positiv gesinn.

Dat entsprécht also och där Démarche, déi d'EU virgëtt an déi se weider wëllt verstärkt durchsetzen. An déi Démarche - et ass och schonns gesot ginn -, déi ass dorobber aus, dass mer bis 2020 solle 50%, ronn 50% vun ei-

sem Hausoffall recycléieren. Mir sinn also hei zu Lëtzebuerg um gudden Wee, mä et ass kloer, dass dat awer nach musse weider Efforté gemaach ginn.

Wien ass ee vun den Haaptacturen - nieft natierlech dem Konsument, deen den Offall produzéiert - hei zu Lëtzebuerg am Beräich Hausoffall? Ech hunn et scho gesot: Ee vun den Haaptacturen, wann net den Haaptacteur, dat sinn d'Gemenge respektiv déi Gemengen, déi eben an de Syndikater zesumme sech gedoen hunn. An dat ass och wichteg: Si behalen hei mat deem Text, dee mer elo hei haut de Mëtteg debattéieren a wäerten ofstëmmen, och eng Haaptresponsabilitéit, déi bei der Gestioun vun dem Hausoffall ass, déi bleift bei de Gemengen.

An ech mengen, dass ass eppes, deem mir och kënnen zoustëmmen. Well et muss ee sech jo bewosst sinn, dass ee sech hei ëmmer an engem Spannungsfeld beweegt tëscht Gemengenautonomie an nationalen an europäesche Virgaben. Et ass also do, an deem Spannungsfeld, wou mer dann och mussen de richtige Wee fannen. An ech mengen, fir eis, fir d'DP ass et kloer, dass d'Zil muss sinn, dass all d'Acteuren, dat heescht, och d'Gemengen, mussen dat Zil fir 2020 erreechen, mä dass de Wee fir dohinuer awer muss, kann op verschidden Aart a Weisen ofgetréppelt ginn.

Op deem Punkt ware jo eng Rei Diskussiounen am Virfeld an der Kommissioun bei den Aarbechten, an déi Solutiounen, déi elo awer am definitiven Text stinn, mat deene kënnen mir op alle Fall liewen, well domadder gëtt da garantéiert, dass nach wie vor all Gemeng eng gewëssen Autonomie huet, ebe fir dës Ziler ze erreechen. Am Ufank war jo Rieds, zum Beispill, dass all Gemeng eng Kollekt respektiv eng Rechnung op d'Gewicht, dass een dat hätt wëllen allgemeng virschreien. Sécherlech hätt dat kënnen en interessant Modell sinn, mä awer all Gemeng fonctionnéiert jo e bësselchen anescht, an dat heescht, do muss een dee Spillraum loosse.

Ech mengen, dee Modell do mam Gewicht, dass ass een, deen a verschiddene Gemengen och ganz gutt fonctionnéiert, mä et gëtt aner Gemengen, déi op aner Methoden, op aner Aart a Weisen awer och hiert Zil erreechen. Ënner dem Stréch muss ëmmer garantéiert sinn, dass iergendwéi och dat Element vun der Quantitéit mat erakënnt. Mä mir hätten awer Schwierigkeete gehat, wann een elo wierklech all Gemeng forcéiert hätt, fir genau deeselwechte Wee ze goen an all Gemeng elo dann déi Dreckskschte mam Chip anzeféieren.

Ech muss och soen doriwwer eraus - dat ass elo vläicht net eng Anekdote -, mä wat mech awer e bësselchen gestéiert hätt, wann een dat wierklech an all Gemeng forcéiert hätt respektiv eng Obligatioun gi gelooss hätt, dass ass, dass een och bei deem System vum Gewicht, dass een do dann zum Beispill, ech soen emol, net den Aspekt vun der Qualitéit vum Offall gekuckt hätt.

Fir dat elo e bësselchen ze illustréieren, mat vläicht engem e bësselchen méi extreme Beispill - ech hat dat och an der Kommissioun gesot -: E Bierger, deen ee Kilo Plutonium a seng Dreckskscht leet, deen am Chip dann also ee Kilo kann uweisen, dee géif also manner bezuelen, wéi ee Bierger, deen zéng Kilo Pabeier an Offall, Bio-Offall géif draleen; obwuel ee Kilo Plutonium jo ganz vill méi komplex ze entsueren ass a vill méi deier eigentlech och wier; nëmme fir e bësselchen ad absurdum ze weisen, dass also esou ee System mat engem Chip, wou ee wierklech nëmmen op d'Gewicht geet, och kéint Problemer stellen.

Also, wann ee wëllt méi effizient recycléieren an asammelen, da muss een och aner Elementer mat a Considératioun huele wéi nëmmen d'Gewicht eleng vun enger Dreckskscht. Et ass jo och evident, et gesäit een zum Beispill an deene Gemengen, wou keng separat gréng Dreckskscht zum Beispill ugebuede gëtt, dass do och d'Leit net kënnen separat de Bio-Offall ewechginn, dass do dat natierlech dann och déi normal Dreckskscht belascht. Dat heescht, et gëtt also nach aner Weeër wéi just d'Gewicht, wou ee muss weider Efforté maachen. Ënner anerem, dass ee wierklech an all Gemeng verschidden, separat Dreckskschten ubitt, fir dass een da wierklech och kann dës le départ an déi Filière vum Recyclage goen.

Och wann ee kuckt um Terrain si jo d'Situatiounen vun deenen eenzelne Gemengen, ob et eng ländlech Gemeng ass, eng Gemeng, déi méi am urbane Raum ass, dass do eben d'Situatiounen ënnerschiddlech sinn. Et soll een also de Gemengen dee Spillraum loosse an ëmmer déi besch, appropriéiert Solutioun fir hir Gemeng fannen. Ech mengen, dass, wat wichteg ass, dass ass, dass mer eben 2020 dann dat Zil vu 50% Recyclage erreechen.

Wéi gesot, am Ufank waren Diskussiounen doriwwer. Mir hunn en Text fonnt, wou also dee



Spillraum da fir d’Gemenge bleift. Ech mengen, deen Eenzenge, deen dat net esou richteg matkritt hat - dat wollt ech och kuerz erwännen -, dat war de President vum Syvicol, dee jo an de Medien, géif ech emol soen, eng Kéier déck Bake gemaach hat a guer net matkritt hat, datt e schonn dräi Kricher hannendra war, datt déi Texter scho laang geännert waren. Ech mengen, dat werft, niewebäi gesot, och Froen op iwwert d’Fonctionnéiere vun esou engem Gremium wéi dem Syvicol, dee jo eigentlech soll d’Stëmm vun all de Gemengen duerstellen an net nëmmen déi vun engem neie Statsrot. Bon.

Wat dat selektivt Asammelen, Här President, vum Hausmüll an dem Recyclage ubelaangt, bleift a mengen Aen nach ee groussen Défi fir déi nächst Joren, an dat ass dat zwar vun de Copropriétéiten.

Ëmmer méi Leit wunnen hei zu Lëtzebuerg an Appartementshaiser. Et ass awer esou, datt bei ganz ville vun deenen Appartementshaiser kaum oder guer net separat an individuell Dreckskëschte gefrot ginn oder dostinn. Dat huet verschidden Ursachen. Bei deenen enge Gemengen, well dat dann net schéin ausgesäit, wann do 27 Dreckskëschten, eenzel Dreckskëschte virun der Dier stinn, jee.

Ech mengen, als Resultat huet een dann, datt eigentlech ganz ondifferenziéiert do mam Dreck verfuert gëtt. Dat heescht, all d’Leit an der Copropriétéit geheien an iergendeng normal grouss Dreckskëscht alles dran. Do ass et dann onméiglech, fir ze recycléieren.

Hei sinn also souwuel d’Gemenge wéi d’Propriétaire gefuerdert. An et wier och gutt, wann hei ënner anerem vun der Ëmweltverwaltung géif konzeptuell Hëllef kommen, fir deem Problem entgéintzewierken. Ech mengen, dat ass wierklech een Défi fir déi nächst Joren, datt mer do eng Solutioun fanne fir de Recyclage, déi individuell Dreckskëschte respektiv dee separate Recyclage vum Dreck.

Ech mengen, do gëtt et och scho Modeller op där enger oder anerer Plaz. Ech ka mech erënnere, 2001 als Statssekretär war ech ënner anerem op Schëffleng esou e Pilotprojet kucken, datt ee sech also och do vläicht inspiréiert an do virukënn.

En anere Punkt, deen och méi kontrovers diskutéiert gouf, ass dee vum Prinzip Pollueur-payeur. Dës Virgab vu Bréissel bestëmmt ëmmer méi Démarchen an all de Beräicher vun der Ëmweltpolitik. Wie verknascht, soll bezuelen. Well de Knascht huet jo och e Präis, fir deen erëm propper ze maachen, respektiv duerch de Knascht entsti jo och Schied, déi een eventuell herno muss flécken.

Och dese Prinzip gouf méi kloer an d’Gesetz ageschriwwen. Mä och hei ass et bliwwen, datt d’Gemengen e gewëssene Fräiraum hunn. D’Gesetz schreift verschidden Elementer vir, déi d’Gemenge musse berücksichtegen, fir esou no wéi méiglech un dee Prinzip Pollueur-payeur erunzekommen. Och virun allem hei soll wa méiglech de Volumen a Betruecht gezu ginn.

Hei bleift e gewëssene Gestaltungsraum fir d’Gemengen. Wou een awer muss betounen, datt an der Vergaangenheet dee Prinzip wäitgehend applizéiert ginn ass. Doduerjer, wann d’Gemengen eng gewëssene Autonomie hei behalen, wäerte mer dann och keng leideg Diskussiounen kréien, wéi dat vläicht beim Waasserpräis de Fall ass.

De Bierger muss sech awer op där anerer Säit och bewosst sinn, datt Dreck maachen e Präis huet an datt een eng gutt Versuergung am Beräich Recyclage net zum Nulltarif ka kréien.

Dat bréngt mech och dann zu verschiddene méi negativen Ugewunnechten, déi dat ka mat sech bréngen, wann ee wierklech konsequent dee Prinzip Pollueur-payeur aféiert. Ech mengen, dat sinn negativ Aspekter, déi een hei zu Lëtzebuerg gesäit, och am Ausland. Ech schwätzen zum Beispill vun all deene wëllen, klengen Deponien, déi een dann emol am Bësch ka fannen, a virun allem vun deem onmoossegem Dreck, dee mer ëmmer méi laanscht eis Stroosse fannen. Dat ass eng permanent Plo, eng Ëmweltverschmutzung. Ech mengen, dat misst een endlech an de Grëff kréien.

Ech mengen, no all deene gutt gemengtene Campagnen d’lescht Joer hate mer där laanscht d’Stroossen, wou stoung mat groussen Panneauen, datt ee soll do e bësselche méi sënnavoll a méi manéierlech virgoen.

Ech weess net, wat d’Resultat ass. Ech hunn nämlech eng Question parlementaire préparéiert, déi ech wäert un den Nohaltegkeitsminister schécken, fir ze wëssen, wat de Bilan vun där Campagne ass, ob wierklech manner Dreck do war. Mä ech mengen, wann do wierklech näischt hëllef, Dir wësst, ech si vläicht net onbedéngt sou do fir „law and order“, mä da muss een awer vläicht soen, do hëllef da

vläicht näischt anescht, wéi datt ee méi streng Strofen aféiert, fir datt d’Leit et verstinn.

Ee Problemfeld - ech kommen op de Schluss, Här President -, dat ass, datt mer zu Lëtzebuerg trotz all deene positiven Entwécklungen, déi ech elo opgezielt hunn, nach e puer Problemfelder hunn.

Ee vun deenen Dossieren, dat ass dee vun den Altlasten, deen nach ëmmer net uerdentlech a landeswäit geléist ginn ass. Dat ass sécher deen Dossier, wou mer, mengen ech, net esou gutt dostinn, wann een d’Bilanz zitt vun eiser Offallpolitik.

Mir hunn zwar en Altlastekadaster opgestallt. Mir hunn an de leschte Joren eng Rei Efforté gemaach, fir all déi al Tippen, et waren der emol eng Kéier 600, ze assainéieren. Mä et geet net duer, datt mer elo déi Kaart do hunn, domadder ze mengen, et wier alles geléist. Mir mussen do dann och nach eng Rei Problemfall ugoen.

Dat huet säi Präis. Do muss ee Prioritéite setzen, wat am urgentesten ass, mä do muss een awer wierklech och drugoen. An da kommen ech och net derlaanscht, dat negativt Beispill vun der illegaler, ech soen emol Pneuendeponie vu Biissen nach eng Kéier ze rappeléieren. Do ass eng illegal Deponie, déi eng Rei Geforen duerstellt fir d’Ëmwelt, besonnesch d’Waasser. A si läit och - dat ass jo dat Schlëmmst do gewiescht -, si läit direkt niewent enger europäescher Naturschutzzone.

Ouni elo wëllen op dee ganzen Historique anzegoen, hätt awer missen, soubal de Problem vun der Verwaltung erkannt gi war an e Konzept fir d’Entsuergung virulouch, de responsables Ëmweltminister, deemools 2007, Décisiounen huelen an esou schnell wéi méiglech dee Site entsuerge.

Mir kennen d’Suiten. Guer näischt ass deemools geschitt. Den deemolege Minister ass senger Flichten a senger Verantwortung dunn net nokomm. An et ass eigentlech schlëmm, datt esou Deponië konnten illegal entstoën. Mä et ass gradesou schlëmm, wann déi politesch Responsabel, aus wat fir enge Grënn och ëmmer, en connaissance des faits net den Assainissement virhuelen.

Ech mengen, mëttlerweil huet d’Majoritéit hei versicht, den Dossier politesch ze entsuerge. Egal wéi, bleift den Dossier trotzdem weider aktuell fir déi nei Responsabel am Ëmweltdepartement. Si si gefuerdert, fir déi noutwendeg Assainissementer elo schnellstens, wierklech schnellstens an d’Wee ze leeden.

Dat gëllt fir d’Deponie Biissen. Mä dat gëllt och fir déi sëllege aner Plazen am Land, wou muss verknaschtene Buedem oder Natur saniéiert ginn. De Minister Schank huet och versprach, endlech aktiv ze ginn...

► **M. le Président.**- Här Berger, Dir misst awer och elo lues awer sécher zum Schluss kommen.

► **M. Eugène Berger (DP).**- Ech kommen zum Schluss, Här President, wann Der mer nach eng hallef Minutt gitt.

De Minister huet jo versprach, endlech aktiv ze ginn an deem Dossier. An duerfir si mer dann och Demandeur, datt mer an deenen nächste Méint hei dann en éischte Bilan virgeluecht kréien.

Här President, ech kommen zum Schluss. Ech hat gesot, datt ee bei deem Gesetz kéint ganz vill a laang all déi Facettë beliichten. Och mir geet et wéi mengem Virriedner, datt also d’Zäit beschränkt ass. Ech hu mech op e puer wesentlech Remarqué beschränkt. Ech sinn net op all Punkt agaangen.

Mä ech mengen, wat mer awer musse maachen, dat ass, datt mer an den nächste Méint, ech soen emol an een, zwee Joer, awer och eng Kéier hei sollen d’Geleeënheet notzen, fir dann en éischte Point ze maachen, en éischte Bilan ze maachen iwwert d’Ëmsetzung vun deser neier Direktiv hei an der Chamber. Ech hunn elo keng Motioun dofir erabuecht. Mä datt een dat awer dann och soll maachen a kucke gegebenenfalls, wa weider Problemfelder bleiwen, dann do ze korrigéieren.

Dat gesot, bréngen ech awer den Accord vu menger Fraktioun zu deem Gesetzesprojet.

Ech soen lech Merci.

► **M. le Président.**- Merci dem Här Berger. Als nächste Riedner ass den Här Roger Negri agedroen. Här Negri, Dir hutt d’Wuert.

► **M. Roger Negri (LSAP).**- Här President, Dir Dammen an Dir Hären, fir d’Éischt wëll ech dem Rapporteur Marcel Oberweis Merci soe fir seng exzellente Rapporten, souwuel dee schrëftleche wéi dee mëndlechen.

D’Tatsaach, dass mir hei zu Lëtzebuerg pro Person 700 Kilogramm Offall am Joer produzéieren an domat 40% iwwert dem EU-Duerch-

schnëtt leien, weist, dass an eiser nationaler Offallpolitik Handlungsbedarf ass. Och wa mer exzellent Resultater bei der Gestiou vun den Offäll hunn, musse mir eis deemno méi wéi anerer Gedanken ëm d’Preventioun maachen a kucken, wéi et zu deene krassen Ënnerscheeder kënn.

Zum Deel léisst sech dat duerch eisen héije Liebensstandard erklären. Et gëtt e kloren Zusammenhang tëschent der héijer Kafkraaft op där enger Säit an dem héije Konsum an den Offallquantitéiten anerersäits. Allerdéngs ass dës Relatioun net zwéngend an et sinn och net nëmmen déi Räich an eiser Gesellschaft, déi vill Offall hunn. Grad bei sozial benodeelegte Leit gesäit een heiansdo d’Tendenz, all Moude matzemaachen a Saachen ze kafen, déi een net onbedéngt muss hunn, mä déi awer grad „in“ sinn.

Dat gesäit een iwwregens och scho bei de Kanner, wou et heiansdo immens wichteg ka sinn, Gezei vun der richteger Marque oder deen neitsten Handy ze hunn. Et ass eng Fro vu Mentalitéit. Hei musse mer probéieren, mat Hëllef vu Campagnen esou vill Leit wéi méiglech zu engem Ëmdenken ze bewegen.

Et ass awer net alles op deen eenzelne Konsument ofzeschieben. Ganz ofgesinn dovun, dass all Marketingstrategie grondsätzlech drop aus sinn, nei Bedierfnisse ze schafen an de Konsum ze erhéijen, gëtt et och vill Produiten, déi esou hiergestallt sinn, dass se eng kuerz Liewensdauer hunn an och da regelméisseg mussen direkt ersat ginn. Oder esou konstruéiert sinn, dass ee se ganz einfach net reparéiere kann, oder eenzel Ersatzstécker méi deier si wéi dee ganze Produit ganz einfach wäert ass. Besonnesch am Beräich - an et ass schonn ugeschwat ginn - vun den elektronische Geräter ass dat üblech.

D’EU-Parlament huet ganz rezent eng nei Direktiv ugeholl, fir den Elektroschrott an Zukunft besser ze recycléieren. An deem Kader si mer gewuer ginn, dass eng Tonn Elektroschrott méi Gold enthält wéi eng Tonn Äerd, an dass eng Millioun Handyen 250 Kilo Sëlwer, 24 Kilo Gold, néng Kilo Palladium an néng Tonne Koffer enthält.

Gläichzäitig gouf kritiséiert, dass de gréissten Deel vun deem Schrott an Drëttwältlänner - wéi scho gesot ginn - geet, wou en ënner la mentable Bedéngungen entsuergt gëtt.

Grad um EU-Niveau stellt een awer fest, dass d’Politik schnell bei der Hand ass, fir de Bierger a Konsumente Virschreften ze maachen an nei Tariffer ze veruerdnen. Méi lues geet et dergéint, wann d’Hersteller vun esou Produkter solle Konzessiounen maachen. Déi kréien ëmmer fir d’Éischt e puer Joer Zäit, fir fräiwëlleg Moosnamen ze ergräifen, a wann dann näischt geschitt, dauert et nach eemol Joren, bis contraingnant Virschreften gräifen, well d’Iwwergangsbestëmmunge ganz grousszügig sinn - fir et elo emol esou ze soen.

Als Beispill heifir wëllt ech just d’Netzsteckere fir d’Handyen erwännen. Jorelang ass doriwwer diskutéiert ginn, wéi onsénneg et ass, dass all Handysmarke an all eenzelne Modell en anert Ladegerät huet an dass een den Handy och just mat Netzstecker ze kafe kritt.

Dat ass enorm vill Elektroschrott, wann een dervun ausgeet, dass et an der EU schätzungsweise 500 Milliounen Handyen gëtt, déi am Schnëtt all zwee Joer ausgetosch ginn.

An trotzdem konnt en d’Hersteller sech och d’lescht Joer erëm laanscht e kloert Gesetz drécken, dat nach just een Universalstecker zouléisst, andeem se sech selwer verflucht hunn, eng kompatibel Norm fir dës Geräter ze akzeptéieren.

Allerdéngs ass vun deenen Universalsteckeren nach ëmmer net vill ze gesinn a si sollen och nëmme fir Smartphones op de Marché kommen.

Wa mer hei konsequent wäeren, géife mer net nëmme fir d’Handyen, mä fir all déi kleng elektronesch Geräter austauschbar Universalsteckere zwéngend virschreiwen, da bräichte mer eis scho manner Gedanken ëm herno de Recycling do ze maachen.

Ähnlech gëllt fir Geräter, déi esou gebaut sinn, dass een den Akku net ersetze kann, oder fir den Drucker, wéi mer dat kennen, wou de Saz Faarfpatroune bal esou deier ass wéi en neit Gerät mat Patronen, déi och nëmmen en bloc austauschbar sinn. An där Beispiller gëtt et nach an et sinn der jo och virdu scho genannt ginn.

Här President, de Projet de loi vun haut betrëfft allerdéngs manner d’Preventioun, och wann ëmmer erëm betount gëtt, wéi wichteg dat wier, mä virun allem d’Gestioun vum Offall. A wéi esou oft soll e käschendeckende Präis d’Leit motivéieren, hiren Offall ze sortéieren an esou weéneg Restmüll ze hannerloosse wéi méiglech.

Et ass natierlech richteg, dass kaum ee sech Gedanken ëm den Offall mécht, wann d’Gemeng e quasi zum Nulltarif géif siche kommen. Wann de Präis, deen een dofir bezilt, proportional klëmmt, jee méi Dreck ee produzéiert, klëmmt och d’Chance, dass d’Verbraucher iwwer hir Konsumgewunnechten ufänken nozedenken a probéieren, manner Offall ze produzéieren. Eng gewësse Sensibiliséierung kann deemno schonn iwwert de Präis erreecht ginn.

An deem Punkt ännert de Projet de loi och net vill, well d’Gemenge sinn elo scho verflucht, e käschendeckende Präis bei der Offallentsuergung anzehalen, iwwregens op Basis vum Gesetz vum 17. Juni 1994, wat den deemolege Minister Alex Bodry sengerzäit op de Wee ginn huet.

Et kënn deemno net zu enger abrupter Erhéijung vun den Taxen, wéi dat vereenzelt beim Waasser de Fall war. Trotzdem: E Präisniveau, deen déi meescht motivéiert, e bëssen opzepassen, wéi vill Offall se produzéieren, a fir méi räich Leit ëmmer nach vläicht Peanuts ass, ka fir eenzel Leit nach ze vill sinn, besonnesch am Cumul mat anere Gemengentaxen a mat de steigenden Energiepräisser gekuckt.

Dofir huet d’LSAP insistéiert, dass d’Gemenge wéi beim Waasser d’Méiglechkeet kréien, benodeelegten Haushalter eng speziell Allocation de vie chère ze ginn, déi sécherstellt, dass si dës Basissevice och an Zukunft ouni Problemer benotze kënnen.

Dat Wichtigst ass jo um Enn, dass jiddweree säin Dreck uerdentlech entsuergt an net iergendwou an öffentlech Poubellen oder an de Bësch geheit.

De Syvicol huet a sengem Avis Bedenke geäussert a gefaart, d’Gemenge kriteen elo e bestëmmte System vun der Offallgestioun opgezwoongen, deen eventuell mat groussen Investitiounen verbonne wier.

An der Chamberskommissioun hu mer dese Bedenke Rechnung gedroen. Et gëtt och an Zukunft keng Gemeng gezwongen, den Offall no Gewiicht ze verrechnen oder Bio-Offall mat enger Haussammlung sichen ze kommen.

Allerdéngs gëtt d’EU-Direktiv, déi mer hei ëmsetzen, kloer Ziler vir, déi mer bis 2015 respektiv 2020 erreeche sollen. De Recycléierungstaux soll bis 2020 e Minimum vu 50% vun den Déchets ménagers duerstellen.

Aktuell läit, wéi och scho gesot ginn ass vum Rapporteur, den Taux bei 42,1%. Bei dem Bau-schutt ass e Minima vu 70% ze erreechen, wou mer bis elo bei 45% leien. De Verbrauch aus erneierbaren Energie soll jo op 11% klammen.

Am europäesche Vergläich steet Lëtzebuerg ganz gutt do, mä et mussen awer nach zousätzlech Efforté gemaach ginn, wa mir déi gesaten Ziler wëllen erreechen. Och d’Gemengen hunn deemno eng Obligation de résultat.

Dobäi fällt op, dass et grouss Ënnerscheeder tëschent eenzelne Gemenge gëtt. Sou hunn zum Beispill just 31 Gemengen hei am Land Biotonnen an nëmmen 21 Gemenge berechnen hir Offallkäschten a Fonctioun vun der real produziéierter Mass, ob no Gewiicht oder Volumen.

Och wann de Gesetzgeber keng Gemeng zwéngt, e bestëmmte System anzeféieren, schéngt et mer awer normal, dass déi Responsabel vun enger Gemeng oder vun engem Syndikat, wa se feststellen, dass se am Resultat ënnert dem Duerchschnëtt leien, eng Analys maachen, wouan dat läit an doriwwer nodenken, hire System ze veränneren.

Wichtig ass an deem Kontext, dass de Stat e Monitoring mécht, sou dass all Gemeng kann nopréiwen, wéi se par rapport zu de gesaten Ziler a par rapport zu anere Gemengen dosteet. All Gemeng soll da selwer decidéieren, wat fir eng Investitiounen fir en neie System sech rentéieren a wat fir eng net.

E Verglach, deen déi beschte Praktiken ervirhieft, sollt och public gemaach ginn. E Bierger vun enger Gemeng x sollt roueg wëssen, ob d’Offallentsuergung a senger Gemeng relativ bëlleger oder deier ass, wat fir Ënnerscheeder et beim Sammelen a beim Weidervewende vum Offall gëtt an ob seng Gemeng beim Recycling gutt oder manner gutt dosteet.

Et wier och gutt, wann deen eenzelne Bierger am Verglach mat Duerchschnëttswäerter e Gefill derfir kéint kréien, ob e selwer éischter vill Offall oder éischter manner Offall produzéiert.

Wichtig ass also hei e kontinuéierleche Fortschritt. Wann een den Historique kuckt, op deen de Rapporteur schonn agaangen ass, ass scho vill geschitt an deene leschte Jorzéngten,



mä déi technesch Méiglechkeeten, wéi mer wëssen, verbessere sech dauernd a mat dësem Fortschrétt musse mer ganz einfach mathalen.

A senger Koordinatiounsroll stellt de Stat d'Regelen op, déi duerno um regionalen a lokale Plang ëmgesat solle ginn. Et ass och um Stat, déi néideg Synergien ze fannen an déi verschidde Partner zesummenzebréngen, fir eis Ziler an deem Sënn ze erreechen.

De Stat spillt och eng aktiv Roll an der Preventioun duerch notament eng gutt Informatiounspolitik. Déi néideg Rapporten an Etüden oder Pilotprojeten erméiglechen e genaue Portrait ze maachen iwwer eis Offallpolitik an och eis Empreinte écologique méi genau ze quantifizéieren, sou dass mer eis e Bild vun der Situation hei am Land maache kënnen an ausserdeem och op Basis vu klore Zuele kënnen schaffen.

Preventioun an Informatioun sti ganz héich an der neier Hierarchie vum Gesetz an duerfir soll dat och net ze kuerz kommen. Eis Fraktioun leet vill Wäert drop, dass de Minister sech dëser wichteger Aufgab unhëlt, fir weiderhin eng kohärent an ambitiéis Offallpolitik ëmzesetzen.

Ee Programme de prévention des déchets soll bis den 12. Dezember 2013 virgestallt ginn an an engem Sechsjorestakt ëmmer aktualiséiert ginn.

An deem Sënn ass et wichtig, dass mir duerch Kollaboratioun mat den nationalen Acteuren an dem Public dobausse gemeinsam Ausweeër fannen, déi den nationalen an de lokale Situationen ugepasst ginn.

Här President, bei den Offallsyndikater gesäit een, dass dat ka mat groussen Investitiounen verbonne sinn. De Stat muss do selbstverständlech säin Deel derzou bäidroen. Et muss gläichzäiteg iwwert d'Syndikatsgrenzen eraus gekuckt ginn, wéi een d'Capacités optimal kann notzen.

An deem Sënn ass et eng positiv Nouvelle, dass sollen Etüde gemaach ginn, wéi déi dräi Syndikater SIDEC, SIDOR a SIGRE kéinten a kënnen - a si maachen dat schonn - zesummeschaffen.

Ënner anerem kann domat d'Quantitéit vun Offall, déi op enger Deponie entsuergt gëtt an duerno einfach versigelt gëtt, eventuell reduzéiert ginn. An hei wollt ech de Minister och froen, wéi virun allem d'Situatioun vun der Deponie vum SIDEC um Fridhaff ausgesäit a wéi laang dës Deponie trotz der Synergie mat SIGRE a SIDOR nach a Betrib bleiwe kann.

Mir müssen ëmmer am Hannerkapp behalen, dass och déi modernsten Anlag begrenzte Capacités huet, a mir hunn all Intérêt drun, dass esou vill wéi méiglech Offall recycléiert, kompostéiert oder verbrannt ka ginn. Dat kréie mer zwar net zum Nulltarif, mä d'LSAP ass grondsätzlech der Meinung, dass et zu den urreegenen Aufgabe vum Stat a vun der Gemenge gehéiert, esou Basisdénegschter wéi Offallentsuergung flächendeckend a gudder Qualität an zu rasonabele Präisser ze garantéieren.

Et ass gewosst, dass mat dësem Gesetz net all Problem aus der Welt geschaf ass, wéi esou oft, mä dëst Gesetz ass an eiser Offallpolitik e weidere Schratt a Richtung Preventioun, Offallvermeidung a Valoriséierung.

An domadder ginn ech den Accord vu menger Fraktioun zu dësem Projet de loi a soen lech Merci fir d'Nolauschteren.

► **M. le Président.** - Ech soen dem Här Negri Merci. Als nächste Riedner ass den Här Camille Gira agedroen. Här Gira, Dir hutt d'Wuert.

► **M. Camille Gira** (*déi gréng*). - Här President, léif Kolleegen a Kolleginnen, och ech wëilt um Ufank dem Rapporteur Marcel Oberweis ganz härezech Merci soen, net nëmme fir säi schréfflechen an och hei mëndleche Rapport, mä fir seng exemplaresch Aart a Weis, un dës Projete erunzegoen.

Dat ass hei schonn erwähnt ginn; nodeems de Projet an der Chamber war, nodeems mer eng Rei Avisen haten, si mer op den Terrain gaangen, bei déi Leit, déi eppes mat Offall ze dinn hunn, bei déi Leit, déi eppes vum Offall kennen, fir bei Visiten an am intensive Gespréich dann de Bols ze fillen, Kritiken um Projet selwer, mä och un der ganzer Politik ze huelen.

Opgrond och vun deene Visiten an deenen Entrevuen, déi mer haten, mengen ech, hu mer eng ganz Rei positiv, konkret Amendementen un dem Text virgeholl, an dat ass eigentlech eng Aart a Weis, déi - fannen ech - mer vill méi oft an dësem Haus kéinte maachen, dass een onofhängeg vun Avisen, déi erakommen, mat deene Leit schwätzt, déi um Terrain all Dag domat ze dinn hunn.

Et ass mir nämlech hei och virkomm, dass eenzel Leit um Terrain sech net erëmfonnt hunn an deem Avis, den eigentlech hir representativ Organisatioun huet missen eraginn. Well, wann ee mat de Leit vum SIDOR, vum SIDEC a vum SIGRE geschwat huet, dann huet een do awer och net usazweis dat erëmfonnt, wat an engem Avis vum Syvicol drastoung.

An ech stellen och hei - och als Buergermeeschter vun enger Gemeng, déi Member ass vun deem Gremium - wierklech d'Fro, wéi do gewëssen Avisen zustane kommen. Wat een do iwwert dëst Gesetz liest, dat huet relativ wéineg mat dem Text ze dinn, deen haut hei ofgestëmmt gëtt, an huet scho guer näischt mat de Realitéiten dobaussen um Terrain ze dinn. An do muss ee sech awer Froe stellen. All déi Leit, déi an deem Gremium sinn, misste sech vläicht déiselwecht Froe stellen. Ech wäert dat herno och nach mat konkreten Zuelen ënnermaachen.

Well dat Gesetz hei de Grondprinzipie vun der grénger Partei entsprécht, wäerte mir och kee Problem hunn, dat Gesetz ze stëmmen. Déi Direktiv, op déi et sech baséiert, huet op där enger Säit kloer Prioritéiten - Vermeidung, recyclingéieren, valoriséieren an dann eréischt eliminéieren -, och kloer Ziler, déi chiffriert si mat Recyclingquoten, a schlussendlech och kloer Prinzipie wéi deem vum Pollueur-payeur a vum responsabele Producteur.

Hätte mer an eenzelnen Ëmweltberäicher esou kloer Prioritéiten, esou kloer Ziler an esou kloer Prinzipien, da wäre mer och do scho vläicht e Stéck méi wäit!

Ech wëll duerfir - an net nëmme nom Rapporteur, mä och nach no eenzelne Virriedner - guer net méi op déi eenzel Ausféierungen an den Detail agoen. Do ass alles längst gesot.

Ech wëlt zwou prinzipiell Interventiounen hei maachen; eng zu dem berühmte Prinzip Pollueur-payeur an eng Kéier zu der Offallpolitik am Allgemengen, och e bëssen am Verglach mat anere Beräicher vun der Ëmweltpolitik, firwat mer da vläicht haut am Offallberäich e Stéck méi wäit si wéi zum Beispill am Naturschutz oder bei der Waasserpolitik. Ech mengen, dass ee sech eigentlech kéint e Beispill un der Offallpolitik an anere Beräicher huelen.

Zum éischte Punkt, Pollueur-payeur. Ech muss soen, ech hu wierklech Schwierigkeiten, déi Opreegung iwwert dee Prinzip an deem Kontext vun dësem Gesetz ze verstoen, wann ech den Avis vum Syvicol liesen, wann ech den Avis vun der Chambre des Salariés liesen an och déi zweetgréissten Zeitung gëschter gesinn hunn. Et kann ee jo iwwer eenzel Saachen ënnerschiddlecher Meinung sinn, mä et kann een awer net sech eppes aus de Fangere suckelen aus engem Text, wat deen net hiergëtt!

Ech muss soen, ech hu wierklech Bedenken, wéi Journalisten hir Pflicht hei an deem Land erfëllen, wa gëscht an enger seriöser Tageszeitung dat hei steet: „Neues Gesetz bittet die Verbraucher zur Kasse.“ Ech weess net, wou déi Leit, déi dat behaupten, ob et Buergermeeschter oder Schaffen am Syvicol sinn, ob et Beamten an der Chambre des Salariés sinn oder ob et e Journalist vum „Tageblatt“ ass, wou een dat wëllt hierhuelen. Ech kann op jidde Fall fir dee Syndikat, deen ëmmerhin d'Halschent - flächeméisseg - vum Land representéiert an Honnertausend Leit als Client huet, hei confirméieren, dass dëst Gesetz d'Poubellen am Norde vum Land keen Euro a keen Cent méi deier mécht.

Et ass éischer de Géigendeel, well mir allegueren eis agesat hunn, dass zum Beispill méi eng genee Definitioun kéint iwwert déi gewerblech Offall, dass ee souguer riskéiert, dass d'Präisser erofginn, well mer de Pollueur-payeur jo net nëmme bei den Haushalter ëmsetzen, mä och bei all deenen anere Leit, déi Dreck produzéieren!

Hei gëtt jo gemaach, wéi wann nëmme d'Haushalter géifen Offall an deem Land hei produzéieren, mä d'Betribler produzéieren es - an esou weider an esou fort. A beim Gewerbemüll zum Beispill stelle mir am SIDEC op jidde Fall fest, dass et bis elo relativ schwierig war, eng kloer Differenz ze maachen tëschent deem, wat een nach zum Hausmüll, an deem, wat een zum Gewerbemüll rechent.

Dat Gesetz hei, wann dann déi Definitioun méi kloer ass plus bei eise agefouerte Kaartesystem, wäert dozou féieren, dass deemnächst Kleng- a Mëttelbetribler emol hir Rechnung bezuelen, déi si eigentlech missten. A mer rechne souguer mat enger Décharge fir d'Haushalter. Duerfir froen ech einfach, wou e Mënsch dat do einfach esou sech aus de Fangere ka suckelen.

Do muss ee jo wëssen, dass dee Prinzip schonn 1994 an dat Gesetz agefouert ginn ass, an ech mengen, dat ass och ouni relativ Opreegung am Land agefouert ginn. Elo sinn eng Rei Gemengen, déi en effektiv vläicht an der Vergaangenheet e bësse méi konsequent ëmgesat

hunn. Mä ech froe mech dann, wann eng Rei Leit elo esou eng opféieren, wann elo haut vun deem Prinzip geschwat gëtt, ob déi dann iere bewosst an deene leschten 20 Joer deen do Prinzip net bei sech an hirer Gemeng oder wou och ëmmer ëmgesat hunn.

Da muss ech mer awer ganz éierlech Froe stellen hei, Här President: Wie suergt dann an deem Land hei derfir? Wa mer manifestement feststellen, dass eng Rei Leit bewosst oder onbewosst eng Rei Gesetzer net ëmsetzen, da musse mer eis iwwerleeën, ob mer eis do an Zukunft net aner Moyenné ginn.

Duerfir verstinn ech déi ganz Opreegung net, zumools, wann een dann op där anerer Säit gesäit am Rapport, dass dann déi Gemengen, déi dës Prinzip vläicht am konsequentesten ëmgesat hunn, och déi beschte Resultater hunn an domat hire Gesamtbudget an hirer Gemeng am mannste belaschten, an dat kann ee jo vläicht net als onsozial duerstellen.

Wat ech da scho guer net verstinn, als zweete Punkt an deem Kontext, dat ass de Verglach mat der Waasserdirektiv. Also, éischters schwätze mer hei vu ganz anere Gréissenuerdungen. An deem Syndikat, wou ech nach ganz kuerz Zäit wäert d'Responsabilitéit hunn, kascht eng 120-Liter-Drecks-këscht - an domat muss all Famill mat zwee Kanner, wa se och net schrecklech oppasst, fir Müll ze vermeiden, eens ginn -, do si mer bei 230 Euro d'Joer.

Ass dat de Problem, dee mer an de Ménagen hunn? Souguer wann déi Drecks-këscht och nach géif 10% - wat de Moment op jidde Fall net de Fall ass - an d'Luucht goen, ass dat de soziale Problem, dee mer am Land hunn?

Ech verstinn d'Welt geschwënn net méi, wa mer hei, wa mer elo vu Famillje schwätzen, déi aarm dru sinn, wa mer näischt anescht fannen, wéi iwwer Waasser an Offall ze schwätzen.

Här President, Dir Dammen an Dir Hären, kommt, mir schwätzen emol iwwert d'Loyeren hei am Land; kommt, mer schwätzen iwwert d'Elektrizitéits- an d'Heizkäschten; kommt, mer schwätzen emol iwwert d'reell Käschte vun der individueller Mobilitéit, da wësse mer, wou mer dru sinn! A kommt, mer schwätzen iwwert dat, wat eng Famill haut ausgëtt, fir dass se nach kann un der Gesellschaft deelhuelen!

Kuckt lech d'Zuele vum Statec un, do wësst Der, wou de Schong dréckt bei de Familljen. An een, dee sech heiansdo d'Méi mécht, an den Office social nolauschteren ze goen, deen huet och festgestallt, dass ganz rar - ganz rar! - eng Famill hir Gemengentaxen net ka bezuelen, mä dass regelméisseg Dosenden, Honnerten, Honnerte vu Leit hei de Stroom ofgepëtzt kréien...

(Interruption)

Bon, Madame, wa vun Ärer Säit eng Interventioun kéint, géif ech vläicht oppassen, wat ech géif soen. Ech kenne keng Gemeng,...

(Hilarité)

Ech kenne keng Gemeng,...

► **Une voix.** - Diddeleng!

► **M. Camille Gira** (*déi gréng*). - ...déi bis elo enger Famill d'Waasser ofgespaart huet. Mä Äre Wirtschaftsminister, dee bis gëscht Wirtschaftsminister war, huet e Gesetz hei virgeluecht,...

(Interruption)

...wou eng Privatfirma kann, ouni Rücksicht op Verloschter, regelméisseg an ouni dass se sech un d'Gesetz hält - an dozou wäert ech lech nach Beispiller eng Kéier hei liwweren -, Haushälter einfach de Stroom ofpëtzen.

► **Une voix.** - Wat huet dat mat der Gemeng Diddeleng ze dinn?

(Interruption)

► **M. Camille Gira** (*déi gréng*). - A mengt Der, et kéint een haut ouni Stroom besser liewe wéi ouni Waasser? Ech mengen net! Da geet Är Heizung net, da geet Äre Frigo net. D'Waasser kéint Der...

(Interruption)

...eventuell nach an de Supermarché kafe goen, mä wou Der alternativ Stroom géift hierkréien zu Lëtzebuerg, dat woen ech ze bezweifelen.

Duerfir sollt een oppassen, wann een eenzel Saachen hei thematiséiert, an oppassen, dass een net Virwërf vis-à-vis vun aner Parteie mécht, déi emol op ee selwer kéinten zrëckfalen.

(Interruption)

Da gëtt gesot - vun deeneselwechte Leit, déi soen, mir kënnen net de Pollueur-payeur ëmsetzen -, do gëtt gesot, mir missten d'Produzente méi eranhuelen. Dat maache mer jo mat deem Gesetz hei. Dat geschitt. Et gesäit ee jo och, dass dat schonn deelweis a Beräicher gemaach ginn ass. Ech denken un d'Frigoen, ech denken un déi ganz Elektronik an esou weider an esou fort. Mä et soll ee sech awer och do

keng Illusiounen maachen: Et ass awer ëmmer erëm de Konsument, deen d'Rechnung bezilt.

E gutt Beispill, wat Dir alleguer kennt: Mir si jo all frou iwwert déi SuperDrecksKëscht - do huele mer jo och d'Produzenten an d'Gebiet; mä wann Der awer Äre Vidange maache gitt, da steet awer ënne ganz fein an anstänneg: SuperDrecksKëscht, esou vill Euro fir den Uelech, esou vill fir d'Batterie. Mir kënnen d'Garagisten an d'Gebiet huelen, mä et ass awer schlussendlech deejéinegen, dee säin Auto an de Vidange féiert, deen dat do muss bezuelen.

Dat souwäit zu där Diskussioun iwwert de Pollueur-payeur; dass ech net verstinn, wou se hierkënn, mä ech mengen och, dass et net korrekt ass, fir ze soen, dass, wann een de Pollueur-payeur uwennt, een dann onsozial wier.

déi gréng soen éischer de Géigendeel. Fir eis ass et onsozial, wann een engem Haushalt mat engem klengen Revenu eng 240-Liter-Drecks-këscht fir en Apel an e Stéck Brout virun d'Dier setzt. Wat mécht een nämlech domat? Domat encouragéiert een deen Haushalt, ongestrooft - wann ech dat emol esou dierf soen - Offall ze produzéieren, esou vill wéi e wëllt. An da mengt ee vläicht, et hätt een de Leit eng bëlle Drecks-këscht virun d'Dier gesat. Dat ass jo och da richtig. Mä wann een awer bis zu Enn denkt, dann huet een d'Leit awer incitéiert, deieren Dreck ze produzéieren.

Well beim Dreck ass et jo d'selwecht wéi beim Rescht, wat ech elo gesot hunn. All dat, wat d'Leit do an déi Drecks-këscht geheien, dat hu se jo eng Kéier bezuelt, beim Akafen. Dir musst jo net mengen, dass d'Fläsch ronderëm d'Biekercher Waasser, dass déi näischt géif kaschten. An d'Verpackung, wat den Här Berger hei elo grad gesot huet, déi ass jo och bezuelt. Heiansdo ass souguer d'Verpackung méi deier wéi dat, wat bannendran ass.

Duerfir schéckt een e falscht Signal u Leit mat klengem Revenu, wann ee seet: „Ma mir hëllefen lech elo, mir setzen lech ganz bëlle eng riseg Drecks-këscht virun d'Dier an dann hu mer lech gehollef.“ Neen, et ass genau de Géigendeel, et incitéiert ee grad déi do Familljen, net ekologesch bewosst ze liewen, an iwwert de laange Wee ass dat do méi onsozial, wéi wann een och deene Leit hëlleft, ekologesch ze liewen, a wa se Problemer kréien, dann dat op eng aner Manéier unzepakten.

Wat ech hei fir den Dreck gesot hunn, géllt fir eis selbstverständlech och fir aner Beräicher, dat hu mer gëschter nach gesot. A mir bleiwe bei eise Prinzip, an d'Realitéit an eng Rei Etüden - net hei am Land, do si mer jo ëmmer e bëssen hannendran, mä aus Däitschland - weisen, et soll een Ëmweltpolitik mat ëmweltpoliteschen Instrumenter maachen an et soll ee Sozialpolitik mat sozialpoliteschen Instrumenter maachen.

Jiddwereen, dee probéiert, ob mat guddem oder schlechtem Wëllen, déi zwee Prinzipien ze vermëschen, deen huet herno eng kontraproduktiv Sozialpolitik gemaach, ganz sécher eng desastréis ekologesch Politik, an e räisst och nach riseg Lächer an den Haushalt vun der Gemeng, well all Service, deen Der generell subventionéiert, déi Se feelen lech herno am Budget. Duerfir ass et kloer an d'äitlech, dass mir bei deem Prinzip wëlle bleiwen.

Duerfir stëmme mer och ouni Bedenken dësem Gesetz zou an duerfir si mer och der Meinung, dass ee beim Waasser datselwecht soll maachen.

Da sinn ech beim zweete Punkt, wou ech kuerz eppes wollt derzou soen, an zwar, firwat mer da vläicht ebe grad bei der Offallpolitik méi wäit si wéi bei der Naturschutzpolitik, guer net ze schwätze vun der Waasserpolitik.

Ech weess net, ob Der wësst, léif Kolleegen a Kolleginnen, dass - ech weess den Datum elo net auswendeg, ech kann lech deen awer liwweren - den Datum net wäit ewech ass, wou dat Land hei all Dag - ech betounen: all Dag! - 11.000 Euro un d'Kommissioun vu Bréissel muss bezuelen, well mer net konform si mat eiser Waasserpolitik.

Ass dat eppes geschafft? Ass dat, well mer iwwer Joren a Jorzéngten net de Courage hatten, dem Waasser dee richtege Präis ze ginn, d'Leit ze incitéieren, ze spueren, d'Gemengen ze incitéieren a Kritären ze setzen, dass se solle mat Zäit Kläranlage bauen an esou weider, ass dat da gutt geschafft, wa mer elo deemnächst 11.000 Euro den Dag mussen op Bréissel iwwerweisen, well mer net capabel waren, an deene leschten 20, 30 Joer dat ze maachen?

Ech mengen, dat ass e Manktum u Courage, deen do op eenzelne Plaze war. A wa mer am Offallberäich esou wäit sinn, dann huet et domat ugefaangen, dass 1980 beim éischte Gesetz de Josy Barthel, et muss ee soen, de Courage hat...

(Interruptions)



Jo, deen hat deemools de Courage, ganz kloer an däitlech ze soen: „Léif Gemengen, elo maacht Der Är 160 wëll Deponien zou, an ech ginn lech Zäit bis e gewëssene Moment, fir an engem Offallsyndikat ze sinn.“ Dat war eng couragéiert Décisioun, déi deemools geholl ginn ass, mam Resultat, dass mer ganz séier flächendeckend Strukturen haten, déi sech där Thematik ugehol hunn.

Wann ech gutt am Bild sinn, sinn haut nach ëmmer Gemengen, déi net an engem Ofwaassersyndikat sinn. Wa meng Informatiounen richteg sinn, bei dem Offall ware se et schonn Ufank vun den 80er Joren. '94 hu mer du mat deem éischte generellen Offallgesetz déi Prinzipië vum Pollueur-payeur an esou weider ëmgesat, mä mer hunn awer, an dat ass e puermol haut gesot ginn, deemools scho keng Obligation de moyen, mä eng Obligation de résultat gemaach.

Mam Resultat, dass an deenen eenzelne Regiounen déi eenzel Syndikater sech och konnten anescht organiséieren, dass mer et awer fäerdegbruecht hunn, an och dat wëll ech hei betounen, dass mer flächendeckend iwwert d'Land bei den Offallpräisser guer net esou wäit ausenanerleien, obwuel zum Beispill e SIEDEC op der Halschent vum Land nëmmen 100.000 Awunner an Awunnerinnen huet, dat ass net méi wéi d'Stad Lëtzebuerg am Ëmkrees vu 5 km, an awer hu mer et fäerdegbruecht.

Mir hunn et fäerdeg bruecht, Här President, Dir Dammen an Dir Hären, mat Zäit duerch d'Applikatioun vum Pollueur-payeur net zu engem gewëssene Moment d'Gemengenhaushälter extrem finanziell ze belasteschten. Wann ech lech soen, dass an deene leschten zéng, 15 Joer am SIEDEC am Norden, wou 55 kleng Gemengen dra sinn, déi net vill Sputt an hiren Haushälter hunn, hu mer 40 Milliounen Euro investéiert, ouni een Euro Kapital.

Firwat? Mä well mer vu '94 u souwuel fir d'Haushälter wéi fir d'Betribber de Pollueur-payeur honnertprozenteg applizéiert hunn. Mir hu Reserve geschaf, a wann ech lech soen, dass, nodeems mer elo eng national Léisung hunn, beim SIEDEC 18.000.000 Euro op der héijer Kanck leien, do gëtt en Deel gebraucht fir en Deckel op dat Lach ze maachen, wat mer da geschwéi kënnen zoumaachen, mä dass mer da souguer nach Reserven hunn.

Stellt lech vir, mir hätte virun 20 Joer schonn de Courage gehat, e korrekte Waasserpräis ze froen. Dann hätten all déi Clienten, déi et bis elo benotzt hätten - Haushälter, Landwirtschaft an Industrie -, iwwer Joren hiren Obolus geleescht. Wann ech héieren, wéi Gemengen, kleng Gemengen an deenen nächste fënnef, sechs Joer wäerte stöhnen ënnert deem Apport en capital fir d'Ofwaassersyndikater, da sinn ech gespaant, wéi eng Diskussioun dass mer do kréien.

Esou kann ech nëmme staunen, wa mer elo nach ëmmer net bereet sinn, endlech de korrekte Präis ze froen, an deenen Haushälter, déi wierklech Schwieeregkeeten hunn, iwwer eng Prime d'allocation de vie chère ze hëllefen. Dann hu mer eng seriö nohalteg Politik gemaach! Mir kréien endlech Incitatiounen, fir Waasser ze spueren; mir erfëllen eis Ziler zu Bréissel a mussen net all Dag 11.000 Euro op Bréissel iwwerweisen a mir rappe keng Lächer an eis Haushälter.

Sou ass dat, wéi mir als Gréng eis nohalteg Ëmwelt-, Sozial- a Wirtschaftspolitik an de Gemenge virstellen. Dat Gesetz hei geet an déi Richtung, an duerfir wäerte mer et stëmmen, an duerfir wiere mir eis och géint all Tentativen, déi sech nach ëmmer an d'Täsch léien a wou déi nächst Generatioun ka kucken, dass se dann eis Fless an eis Séier erm an Uerdnung kréien. Dat kann et net sinn.

Ech soen lech Merci.

► **Plusieurs voix.** - Très bien!

► **M. le Président.** - Merci dem Här Gira. Als nächste Riedner ass den Här Gibéryen agedroen. Här Gibéryen, Dir hutt d'Wuert.

► **M. Gast Gibéryen (ADR).** - Merci, Här President. Léif Kolleeginnen a Kolleegen, ech wëll och vun eiser Säit aus dem Kolleeg Marcel Oberweis Merci soe fir säi Rapport, virun allem och dee schréfftleche Rapport, deen eng ganz Rei vu flotten an nützlechen Informatiounen, statisteschem Material beinhaltet, wat ëmmer e gutt Nuschlowierk wäert bleiwen, wann een an dës Diskussioun erageet. Dëst Gesetz, wat als Objet huet, eben eng europäesch Direktiv ëmzesetzen iwwert d'Offallgestioun.

Et ass am Fong, Här President, schued, wa mer mengen, mir missten eng europäesch Direktiv hunn, fir eng uerdentlech Offallgestioun ze maachen. Misst et net eng Selbstverständlechkeet sinn, dass all Land, all politesch Responsabel, ouni musse vun Europa virgeschriwwen ze kréien, mä um nationalen Niveau déi Gestiou misst maachen? An duerfir bedauere mer am

Fong, dass 27 State mussen op europäeschem Niveau zesummekommen, fir dann do eng Direktiv unzehuelen, wou se sech dann obligéieren, doheem eppes ze maachen, wou se vläicht ouni déi Direktiv ni de politesche Courage gehat hätten, fir dat ze maachen.

Lëtzebuerg, mengen ech, huet och ouni Direktiven an de leschte Joren, an der Vergaangenheet schonn eng relativ offensiv Offallgestiounspolitik hei gemaach. De Gros vun de Gemengen huet do matgemaach. A wa mer haut kucken, wat fir eng Villfalt datt mer haut am Recyclage hunn - dat geet vun der groer iwwert déi gréng Këscht, et gëtt Glas, et gëtt Pabeier, d'Valorlux, d'SuperDrecksKëscht, Sperrmüll, Schrott, Elektroschrott bis hi bei d'Chrëschtbeemercher -, dann, mengen ech, sinn d'Gemengen haut scho gutt organiséiert, fir alles dat matzehuelen.

Et ass also eng Gestiou, déi hei zu Lëtzebuerg ganz wäit geet. A wa mer elo iwwert d'Direktiv als Zil kréien, dass mer sollen upeilen, fir 50% an Zukunft ze recycléieren hei zu Lëtzebuerg, da muss ee wëssen, dass mer hei zu Lëtzebuerg awer scho praktesch un där Grenz ukomm sinn. Et muss een awer och wëssen, dass mer hei zu Lëtzebuerg an deem Land sinn, wou pro Kapp mat 700 Kilo pro Awunner pro Joer am meeschten oder mat am meeschten Dreck gemaach gëtt.

D'ADR ass duerfir averstanen, dass mer ëmmer méi Offall recycléieren, a wat méi wichteg ass, dass mer manner méi... Neen, ëmmer méi manner Offall maachen. An dat, mengen ech, hunn och scho Virriedner hei ugeschwat, dass mer virun allem d'Produktionsindustrie, déi dat am Fong muer produzéieren, misste méi reglementéieren, dass se bei der Produktioun, bei der Hierstellung vun de Wueren och mussen oppassen, souwuel wat d'Wuer selwer wéi den Emballage vun der Wuer ubelaangt, fir esou mann wéi méiglech Produiten hierzustellen, déi herno als Offall an deelweis als schwéier recycléierbaren Offall musse betruucht ginn.

Haut geet ee ganz dacks hin an et geet een eppes akafen, a wann een et doheem ausgepaakt huet, da stellt ee fest, dass de Volume vun deem, wou et agepaakt ass, méi grouss ass, wéi et virduin ausgesinn huet respektiv wéi dat, wat ee selwer akaaft huet. De Kolleeg Roger Negri huet eng Rei vu Suggestiounen gemaach, déi een an där Hisiicht ka mat zwou Hänn ënnerschreiwen.

Här President, wann een och averstanen ass, dass mer musse méi recycléieren, esou sinn ech mat mengem Virriedner, mam Kolleeg Camille Gira, awer doudsécher net averstanen. Ech sinn iwwerzeegt, dass eng vun den Haaptrepercussioune vun dësem Gesetz wäert sinn, dass d'Taxé wäerte massiv an d'Luucht goen.

(**Interruption**)

Wa mer...

Här Gira, loosst mech schwätzen! Ech hunn lech och net ënnerbrach.

Ech wëll lech just soen, wéi mer hei an der Chamber iwwert d'Waasser geschwat hunn, hate mer déiselwecht Diskussioun. An haut wësse mer, wat d'Transpositioun vun der Waasserdirektiv als Konsequenzen hat, a wéi vill dass d'Leit haut am Land méi u Waasser ze bezuelen hunn.

An ech verstinn och net déi gréng, dass déi de Präis vum Waasser hei wëlle minimiséieren. Wéi wann déi wëlle soen: „Ma dat ass awer fir d'Leit kee Problem, déi puer Honnert Euro, déi se d'Joer do musse bezuelen.“

(**Brouhaha**)

Ech weess net, a wat fir enger Welt dass déi gréng liewen. Ech hat gemengt, den Här Gira wier Buergermeeschter vu Biekerech...

► **M. le Président.** - Här Gibéryen, den Här Gira wëllt lech eng Fro stellen.

► **M. Gast Gibéryen (ADR).** - Wann Dir mir herno Zäit bäigitt, da kann en esou vill Froe stellen, wéi e wëllt, Här President.

(**Interruption**)

Ech wëll lech dat just soen. Wann Der d'Zäit stoppt, dann hunn ech kee Problem dermat. Ech hunn nëmmen zéng Minutten.

Ech wëll just soen: Ech hat gemengt, den Här Gira wier Buergermeeschter vu Biekerech, mä et schéngt éischter, wéi wann e Buergermeeschter vu Monaco wier.

(**Interruptions**)

Well hei... Op jidde Fall, déi Leit, déi hei am Land liewen, fir déi ass de Waasserpräis haut méi wéi deier!

(**Interruption**)

Haut hunn d'Leit... Een, deen eng Famill huet mat zwee Kanner, dee muss duerch déi nei Waasserpräisser, déi komm sinn, alt bis 500

Euro d'Joer weider bezuelen, ouni eppes weider ze hunn. A wann dat hei vun deene Gréng minimiséiert gëtt, wéi wann all Mësch dat misst kënnen bezuelen, da froen ech mech, a wat fir enger Welt dass déi gréng liewen.

An hei wäert et genau d'selwecht goen! An ech halen, Här President, fest, dass den Här Gira gesot huet: Keen Cent - keen Cent, huet en hei behaupt - géifen d'Mülltaxen duerfir an d'Luucht goen. Mir wäerten nach feststellen, wéi dat an Zukunft wäert sinn. Ech soen lech: Se gi ganz massiv an d'Luucht!

De Prinzip vum Pollueur-payeur, Här President, dass ass ee Prinzip, dee mir och ënnerschreiwen. Mä wa mer awer elo hei wëssen, wat mer hei aféieren, da musse mer wëssen, wa mer dee Prinzip bis an d'lescht Instanz duerchexekutéieren, mat alle Verwaltungskäschten an alles, wéi mer dat beim Waasser maachen - an esou wäert et herno hei goen! -, da gëtt et deier.

An ech géif och déi gréng Kolleegen emol invitéieren, wa se vum Prinzip vum Pollueur-payeur ausginn, wéi mer an der Comexbu driwwer diskutéiert hunn, dass op de Friche-industriellen op Belval/Esch, wou de Steierzueler iwwer 100 Milliounen muss bezuelen - de Steierzueler muss bezuelen! -, fir der ARBED hir verseuchten Terrainen ze renaturéieren, do hunn déi gréng matgestëmmt, dass de Stat déi 100 Milliounen iwwerhëlt.

Ech war deen Eenzegen, deen de Courage hat, fir dergéint ze stëmmen an der Comexbu. déi gréng hu matgestëmmt, dass do d'Allgemengheet muss bezuelen, fir dass d'Allgemengheet der Arcelor hiren dreckege Buedem muss recycléieren! Dat hunn déi gréng do matgestëmmt! Do huet de Prinzip vum Pollueur-payeur net gespillt, well eben zu Esch an zu Bielefeld déi gréng zoufälleg am Schäfferot setzen. Da spillen aner Konditiounen eng Roll.

(**Brouhaha**)

Ech mengen, och dat sollt Der hei soen! Hei gëtt dee kleng Bierger, d'Famill mat de Kanner...

► **M. Camille Gira (déi gréng).** - Wat ass Äre Problem?

► **M. Gast Gibéryen (ADR).** - Här Gira, d'Famill mat de Kanner, déi bezilt hei bis op de leschten Cent de Prinzip vum Pollueur-payeur, awer wann et ëm d'Arcelor geet, dann hunn déi gréng...

(**Brouhaha général**)

► **M. Félix Braz (déi gréng).** - Dat ass lech dach egal!

► **M. Gast Gibéryen (ADR).** - ...keng Problemer, fir hinzegoen a fir dann eben de Pollueur-payeur net méi ze maachen!

► **M. Félix Braz (déi gréng).** - Dat ass lech dach egal!

(**Brouhaha général**)

► **Une voix.** - Dat doten ass scho Populismus!

► **M. le Président.** - Sou! Ech bieden lech alleguerten, lech emol e bëssen ze berouegen!

► **M. Félix Braz (déi gréng).** - Dir sidd e Schauspiller um Déclin.

► **M. le Président.** - An den Här Gibéryen fiert virun.

► **M. Félix Braz (déi gréng).** - Dir sidd e Schauspiller, dee seng beschte Rolle schonn hanneru sech huet!

(**Brouhaha général**)

► **M. Gast Gibéryen (ADR).** - ... huet emol gesot: „Gréng gëtt deier!“ Wéi recht hat en, wéi en dat deemools gesot huet!

Op jidde Fall, Här President, mir stëmmen och duerfir dat Gesetz hei net, well mer einfach soen: Den Hauptgedanke wäert herno sinn... An da kënnt den Här Gira heihinner a fält iwwer eng Zeitung hier, well déi seet: „Neues Gesetz bittet die Verbraucher zur Kasse.“ Dat ass, wéi mer déi gréng kennen. Si kënnen fir jiddweree Lektionen erdeelen. Jiddwereen huet onrecht! Just si eleng - si eleng! - hu recht!

An da komme mer un den Niveau vun de soziale Kritären. Da gëtt gesot do,...

(**Brouhaha**)

► **M. Félix Braz (déi gréng).** - Schlechten Text!

► **M. Gast Gibéryen (ADR).** - ...Leit, déi eng Allocation de vie chère kréien, déi sollen eppes bäikréien.

► **M. Félix Braz (déi gréng).** - Net geübt! Schlecht Regie!

► **M. Gast Gibéryen (ADR).** - Här President, mat där Politik do...

► **M. Félix Braz (déi gréng).** - Schlecht Regie! Kuckt dach Äre Veräin! Schummt lech dach!

(**Brouhaha général**)

► **Une voix.** - Très bien!

► **M. Félix Braz (déi gréng).** - 20 Joer President, alles an de Gënz gekéiert.

► **M. le Président.** - Ech bieden lech elo, dem Här Gibéryen nozelauschten!

► **M. Gast Gibéryen (ADR).** - ...wann all Mësch muss op d'Gemeng quasi heesche goen, seng Revenuen duerleeën, fir Ënnerstëtzungen ze kréien, fir nach kënnen seng Steuern, seng Gemengentaxen, säi Waasser a säin Offall ze bezuelen. An och - dat wëll ech just soen -, déi Leit, déi eng Allocation de vie chère kréien, déi kréien eng Ënnerstëtzung.

D'Kollegee vun der CSV sinn deen aneren Extrem. De Kolleeg Gilles Roth huet als Budgets-rapporteur hei gemengt ze soen: Déi, déi iwwer 500.000 Euro d'Joer verdéngen, déi bräichten awer senger Meenung no kee Kannergeld ze kréien. Dat ass deen een Extrem. déi gréng sinn deen aneren Extrem. Do kréien nach just déi,...

(**Interruption**)

...déi um RMG leien. Mä och do dertëscht eng Famill, déi 3.000, 4.000, 5.000 Euro verdéngt,...

► **M. Félix Braz (déi gréng).** - Souwäit kënnt et nach!

► **M. Gast Gibéryen (ADR).** - ...déi huet haut Problemer, fir d'Waasser a fir d'Kanaltaxen a muer och d'Dreckschëstentaxen ze bezuelen. Also, et kann een net higoen a just soen, déi Leit, déi eng Allocation de vie chère kréien,...

► **M. Félix Braz (déi gréng).** - Otemt eng Kéier! Huelt eng Pëll! Berouegt lech!

► **M. Gast Gibéryen (ADR).** - ...mussen eng Subventioun kréien. Och déi Leit, déi driwwer leien, Famillje mat Kanner, déi kommen ëmmer hei an deem Land méi ënner Drock, well se mat hire Recetten um Enn vum Mount net méi auskommen, fir ze iwwerliewen.

An dann, Här President, de Clou, deen den Här Gira hei ofgeschoss huet, dee wëll ech awer nach an deene leschte 60 Sekonne soen. Dat ass, wéi e gesot huet: Wann d'Gemengen hingginn a si stelle Leit mat kleng Revenuen, sozial schwache Revenuen, kleng Famillje mat quasi dem RMG, wa mer deene gratis géifen elo och nach eng grouss Dreckschëst dohinnerstellen, da géife mer déi incitéieren, méi akafen ze goen!

Här President, dat war de Combell! Wéi wann déi Leit géife fir d'Éischt, ier se akafe ginn, an d'Dreckschëst kucke goen: Wat hunn ech nach Plaz?

(**Hilarité**)

An elo ginn ech akafen, fir meng Dreckschëst ze fëllen.

Ma déi Leit gi kucken, wat hinnen am Frigidaire doheem feelt a wat se brauchen, fir ze liewe fir hir Kanner! An dat gi se akafen! A se kucken net an d'Dreckschëst kucke goen: Wat hunn ech nach Plaz?

Här President, Dir Dammen an Dir Hären, et deet mer leed, mä ech mengen, déi gréng hunn de Buedem vun der Realitéit verluer. Mir wäerten dat Gesetz hei net stëmmen.

► **Plusieurs voix.** - Très bien!

► **M. le Président.** - Merci dem Här Gibéryen.

► **M. Camille Gira (déi gréng).** - Ech hunn e Fait personnel.

► **M. le Président.** - Jo, den Här Gira. Et ass zwar kee Minister, den Här Gibéryen. Nach net, hein.

(**Hilarité**)

► **M. Camille Gira (déi gréng).** - Ech mengen...

► **M. Gast Gibéryen (ADR).** - Här President, ech wëll just wëssen, a wat fir enger Prozedur dass mer sinn.

(**Interruptions diverses**)

Dann däerf ech d'Wuert och nach kréien.

► **M. Félix Braz (déi gréng).** - An där vun der kontradiktörescher Debatt!

► **M. Gast Gibéryen (ADR).** - Ech sinn dermat averstanen.

► **M. Félix Braz (déi gréng).** - Wien ausdeelt, muss och kënnen astiechen. Wat sidd Dir fir en Demokrat?

► **M. le Président.** - Dir hutt nach Zäit.



► **M. Félix Braz** (*déi gréng*).- Wat sidd Dir en Demokrat, Här Gibéryen! Schummt lech dach! Kontradiktorsch Debatt: Ni héieren? Ni héieren!

(*Interruption*)

Jo, jo. Dir sidd e schéinen demokratesche Veräin.

► **M. le Président**.- Den Här Urbany fiert elo emol hei virun. Hie mécht och nach seng Interventioun. A bis dohinner hunn d'Gemidder sech vläicht berouegt.

► **M. Serge Urbany** (*déi Lénk*).- Här President, ech weess awer net, ob ech zur Mäbëgung hei wäert bäidroen vum der Debatt.

► **M. le Président**.- Probéiert emoll!

► **M. Serge Urbany** (*déi Lénk*).- Dat eenzegt Element vum Mäbëgung bei mir wäert de Chronometer sinn. Well ech mengen nämlech, wat geschitt hei mat dësem Gesetz, och wa verschidde Prinzipien dovun scho méi laang festleien? Mat dësem Gesetz gëtt definitiv festgehalen, dass den Offall eng Wuer ass wéi déi aner och, an zwar, andeem d'Käschte vu senger Beseitigung sollen integral op de Verbraucher ofgewälzt ginn.

An ech wëll hei wierklech a Fro stellen, ob de Verbraucher de Pollueur ass. Wien ass hei de Pollueur? Et gëtt nämlech net an dësem Gesetz hei definitiv geregelt, wat zum Beispill d'Verantwortung vun der Industrie ass, fir aner Produiten ze produzéieren an esou weider.

Wat steet iwwert d'Responsabilitéit vum Producteur dran? Ech wëll hei aus dem Gesetz virlesen, den Artikel 19: «Il est tenu compte de la viabilité économique (...) tout en respectant la nécessité d'assurer le bon fonctionnement du marché intérieur.» Dat sinn d'Grenzen, déi de Producteur gesat sinn, déi jo a Wierklechkeet leschten Enns déi sinn, déi déi Produktéier produzéieren, déi fir d'Leit herno e Problem duerstelle bei der Beseitigung.

Ech mengen also, éischtens, dat Gesetz hei beideit eng Ännerung am Finanzierungsmodus vun enger vun de Käraufgabe vun der Gemeng, nämlech d'Beseitigung vum Müll. „L'enlèvement des encombrements“ stoung an engem Dekret vu 1700 - ech mengen - '89 oder '90, nach vun der Franséischer Revolutioun. Et ass also eng Käraufgab vun der Gemengen, fir derfir ze suergen, dass de Müll beseitigt gëtt.

Wat geschitt hei? Amplaz dass wéi virdrun, op d'mannst zu engem groussen Deel, iwwer ëmverdeelend Steieren - Steieren um Revenu, Steieren op de Gewënner - déi Grondaufgab vun der Gemenge finanzéiert ginn ass, gëtt se elo ersat - weinstens am Prinzip, a geschwënn wäert et och ganz de Fall sinn - duerch eng Aart Produktsteier, déi erhuewe gëtt um Produkt, deen de Consommateur muss bezuelen, deen dee Produit keeft. Eng Aart TVA also, ouni Considération op déi eigentlech Akommissiatioun.

Ech wëll net agoen op dee ganzen ekonomeschen Aspekt, deen nach do hannendrunhänkt, well do handelt et sech jo bei deene Verwäertungsindustrien ëm eng regelrecht Industrie, wou grouss Profitter gemaach ginn. Et ass jo net fir näischt, dass ee vun deene gréisste franséische Konzern Propriétaire ginn ass vun der Firma Lamesch zum Beispill. Do ginn also ganz grouss Gewënner gemaach.

Dat ass nach e weideren Aspekt. D'Leit ginn nach embrigadéiert, fir alles schéin ze wäuschen an alles schéin op d'Plaz ze tässelen, fir dass grouss Entreprises an deem Beräich kënnen hir Benefisser maachen. Dat ass e weideren Aspekt dervun.

An ech mengen och, dass et net esou ass, wéi den Här Gira sot, dass et net zu enger Präiserhéijung wäert kommen. Ech liesen hei, wat den honorabele Rapporteur vun dësem Gesetzesprojet, den Här Oberweis, haut op RTL gesot huet. En huet gesot: „D'Tariffer riskéieren an Zukunft ze klammen. Et misst an der Gemengen an an der Syndikater ënnersicht ginn, ob et iwwerhaapt käschtedeckend ass. A wa festgestallt gëtt, dass dat net de Fall ass, da mussen d'Taxen an d'Luucht gesat ginn.“

Dat ass dat, wat och a Wierklechkeet wäert geschéien, egal wat eis hei verzielt gëtt. Et ass wierklech awer bedauerlech feststellen, dass déi Parteien, déi nach virun e puer Deeg den Index manipuliert hunn, den Index blockéiert hunn, dass en net méi erfällt, elo gläichzäiteg de Leit nei Präiserhéijungen iwwert deen heite Wee opdrängen.

Déiselwecht Leit hunn iwwregens elo just nach eng Tax hei gestëmmt, déi deene räiche Leit op der Finanzplaz zeguttkënn.

(*Interruption*)

Dat ass d'Realitéit!

► **M. le Président**.- Här Urbany, Dir misst elo zum Schluss kommen, wann ech gelift.

► **M. Serge Urbany** (*déi Lénk*).- Ech wäert selbstverständlech, Här President - ech kenne jo Är Suerg - elo direkt ophalen, awer herno géint dat Gesetz hei stëmmen.

► **Une voix**.- Très bien!

► **M. le Président**.- Merci dem Här Urbany.

Elo kritt den Här Camille Gira d'Wuert op Base vum Artikel 42 vun eisem interne Reglement iwwert de Fait personnel. An den Här Gibéryen, wann e sech dann doduerch aggresséiert fillt, kann dann nach eng Kéier äntwerten. Här Gira, Dir hutt d'Wuert.

► **M. Camille Gira** (*déi gréng*).- Här President, ech si frou, dass meng Rechnung voll opgaang ass. Nodeem ech eis kloer an d'äitlech Positioun zum Prinzip Pollueur-payeur hei duergeluecht hunn, sinn d'Populiste vu riets a vu lénks geschlossen ugetrueden.

► **Une voix**.- Très bien!

► **Une autre voix**.- Oh!

► **M. Camille Gira** (*déi gréng*).- A well se natierlech schlecht Argumenter hunn,...

(*Interruption*)

...komme se dann heihin a maache wierklech och nach de Geck - wierklech de Geck - mat deene sozial schwachen Haushalter. Wann een hei probéiert kloerzemaachen,...

► **Une voix**.- Très bien!

► **M. Camille Gira** (*déi gréng*).- ...wéi ee sozial schwach Haushalter derzou kritt, dass se net an d'Fal vum Uelech lafen, dass se net an d'Fal vun der Ressourcë lafen, da kënnst hei den Här Gibéryen a mécht de Geck mat esou enger Positioun. Mä dat wonnert mech net. Natierlech ass de Frust vun der ADR ganz grouss, dass se besonnesch um Niveau communal net méi vertrueden ass.

A wann Ären Apport zur Entwécklung vu Belval net méi grouss ass wéi dat, wat elo vun lech komm ass, da verstinn ech zwar och, dass Der an der Gemeng Esch iwwerhaapt net méi representéiert sidd. Esou genee wëssen d'Leit am Süden Ären Apport vun der ADR ze bewäerten.

Zum Fong awer. Dir hutt mech op eenzelne Punkten an der Mond geholl. Ech hunn hei net gesot, ech géif d'Garantie ginn, dass a kenger Gemeng am Land opgrond vun deem heite Gesetz eng Tax géif an d'Luucht goen. Ech hu gesot, dass ech aus eisen interne Berechnungen aus dem SIEDEC weess, dass fir 55 Gemengen am Land duerch dat heite Gesetz d'Käschte fir d'Offallproduktioun keen Cent an d'Luucht ginn. An dozou stinn ech och.

A firwat ass dat da vläicht esou, Här Gibéryen, Här President, Dir Dammen an Dir Hären? Mä well dee Syndikat vläicht am konsequentesten an deene leschten 20 Joer dee Prinzip Pollueur-payeur, awer net nëmmen - awer net nëmmen! -, bei de Ménagen agefouert huet. An déi, déi dat Gesetz éierlech wëlle beuerteelen, déi mussen et och liesen. An déi fannen dann eraus, dass d'Betriber gradesou konsequent wëlle matmaachen. An ech ginn lech e Beispill; och lech, Här Urbany, dee sech d'Liewen ëmmer e bëssen einfach mécht.

Mir hunn dat nëmme konsequent fir d'Ménagen ëmgesat. Virun 20 Joer huet d'TREFIL-ARBED vu Bëiwen 500 Euro fir e ganze Camion Eiseschlamm bezuelt an ass domat op de SIEDEC komm, dee vun den Haushalter bezuelt ginn ass. Do hu mer eis gewiert a mer hu gesot: „Et kënnst net a Fro. Dir bezuelt elo de Principe Pollueur-payeur!“

A wësst Der, wat geschitt ass? An Tëschenzäit recycléiert d'TREFILARBED Bissen deen Eiseschlamm a mécht souguer nach Geld dermat. Just fir lech ze soen, dass d'Applikatioun vum Principe pollueur net nëmme bei den Haushalter mëttelfristeg méi sozial ass, méi ökologesch a méi wirtschaftlech, mä et och bei de Betriber ass. A wann eben e SIEDEC et faerdegbruecht huet, obwuel en e rise Gebitt huet, haut de Leit Taxen ze offréieren, déi net wesentlech méi héich sinn, dat ass, well mer genau déi Politik, déi ech hei verteidegt hunn, konsequent ëmgesat hunn.

A fir lech ze weisen, dass et beim Waasser genau d'selwecht ass, Här President - wann ech just nach eng hallef Minutt hunn -: Ech bréngen lech d'Chiffere schwaarz op wäiss, dass d'Gemeng Biekerech déi Politik vum Waasser, wéi mer se eigentlech missten ëmsetzen duerch d'Waasserdirektiv, scho 15 Joer konsequent ëmsetzt. A wësst Der, wat d'Resultat ass? Dass den Duerchschnittsverbrauch pro Kapp zu Biekerech 20 bis 25% méi niddreg ass wéi am Rescht vum Land.

Dat ass sozial Politik, well do verdéngt jiddweree Suen. Do verdéngt d'Gemeng. An dofir ass en Haushalt do.

An, Här Gibéryen, wann ech mengen Nofolger an der Gemeng esou eng katastrophal Scholdesituatioun iwwerlooss hätt, dass een elo an der Zeitung muss liesen, dass de politesche Spillraum vun Ärem Nofolger an der Gemeng op null zrëckgeroden ass, da géif ech wierklech net heihinnerkommen an anere Leit Lektiounen erdeelen, wou dat gutt ass.

A just als Ofschloss: Dir sidd net méi an der Gemeng. Ech mengen, duerfir feelt lech och déi gewësse Relatioun nach zu deene kleng Leit, déi emol an den Office social mussen hikommen.

► **Une voix**.- Hohoho!

► **Une autre voix**.- Très bien.

► **M. Camille Gira** (*déi gréng*).- A fir lech ze soen, dass jo anscheinend awer eng konsequent ökologesch Politik net esou schlecht honoriéiert gëtt a vläicht besser wéi Är Positiounen, dat hu spéitstens déi lescht Gemeinderotswahlen zu Biekerech, mä och nach op anere Plaze gewisen.

Ech soen lech Merci.

► **M. le Président**.- Merci dem Här Gira. Nach ganz kuerz, Här Gibéryen.

► **M. Gast Gibéryen** (*ADR*).- Här President, ech froe mech, wat Der mat deem ganz kuerz mengt? Et ass opgrond vun deemselwechten Artikel wéi den Här Gira d'Wuert gefrot huet, esou datt dat ganz kuerz genausou ganz kuerz ka sinn.

► **M. le Président**.- Et si fënnel Minutten, Här Gibéryen.

► **M. Gast Gibéryen** (*ADR*).- Voilà, voilà, dat ass scho besser. Fënnel Minutten, wéi dat beim Här Gira de Fall ass.

Ech wëll vläicht beim leschte Punkt, wou den Här Gira ugeschwat huet, mengem Nofolger an der Gemeng Fréiseng, wëll ech lech just soen, datt d'Gemeng Fréiseng am Abléck e Budget huet vun zwielef Milliounen an datt se an hirem ordinäre Budget iwwer zwou Milliounen lwwerschoss huet. Dat ass e relativ héije Prozentsaz. Et si bestëmmt net vill Gemengen, déi esou en héijen lwwerschoss an hirem ordinäre Budget hunn, bei zwielef Milliounen zwou Milliounen am ordinäre Budget. A wann d'Konte kommen, sinn ech iwwerzeegt, datt den lwwerschoss net zwou Milliounen, mä 2,5 Milliounen bei zwielef Milliounen Budget wäert sinn. Da sinn d'Scholde bezuelt.

An d'Gemeng Fréiseng, mäin Nofolger - dat ass jo net deen, dee mer elo hunn, dat war dee vun der leschter Period -, deen huet an deene leschte véier Joer keen Euro Schold brauchen an der Gemeng Fréiseng opzehuelen. Dee konnt mat der Finanz vum der Gemeng Fréiseng all Projeten investéieren, ënner anerem eng nei Spillschoul an esou viru bauen.

Elo kënnst eng aner Partei, d'CSV, un d'Majoritéit, déi eben elo mengt, si misst soen, well se vläicht onfäeg ass, fir déi Gemeng uerdentlech ze leeden, d'Gemengefinanze wäeren nach net an der Rei. Si hunn zum Beispill an dësem Budget en Emprunt ageschriwwen vun 1,3 Milliounen. Si hunn awer fir 1,5 Milliounen Kreditter an den extraordinären Dépenses agesat, déi doudsécher net gemaach ginn. Wa se en uerdentlech Budget opgesat hunn, brauch och d'Gemeng Fréiseng am Joer 2012 keen Euro Schold opzehuelen. D'Gemeng Fréiseng ass also méi wéi finanziell gesond. Dann huet se fënnel Joer hannereneen...

(*Interruption*)

...fënnel Joer hannereneen huet d'Gemeng Fréiseng keen Euro da brauche vun Emprunt opzehuelen. Dat just zur Gemeng Fréiseng an zur Finanzsituatioun vun der Steieren.

Ech mengen, Här President, den Här Gira, deen huet gemengt, e misst d'Gemengewahle mat dranzeien. Ech sinn iwwerzeegt, wann d'Leit zu Esch an zu Biele gewosst hätten, wéi deene Gréngen hir Politik ass, datt se bei der Gemeengentaxen zouschloen an d'Leit do zur Keess bieten an op där anerer Säit der ArcelorMittal 100 Milliounen Euro Steiergeschenker maachen - well si hunn deem zougestëmmt, dat kënnst Dir dreien a kéiere wéi Dir wëllt, dat ass eng Réalitéit -, wann déi gréng matgestëmmt hunn, fir datt d'Allgemengheet...

► **Une voix**.- ...op 3,9.

► **M. Gast Gibéryen** (*ADR*).- Jo, jo. Mir sinn iwwerzeegt, an Dir wësst et och, mir hunn d'Chiffere virleie gehat, datt mer herno wäerte bei 100 Milliounen leien, déi d'Allgemengheet muss bezuelen, fir dat ze maachen...

► **Une voix**.- Déi si vu 6,8 op 3,9...

(*Interruptions diverses*)

► **M. Gast Gibéryen** (*ADR*).- An dann hei ze soen, mir géifen de Geck mat deene sozial Schwaache maachen! Mä, Här Gira, ech hunn lech hei ganz kloer gesot, datt fir eis déi sozial Schwaach net nëmmen déi Leit sinn, déi den RMG kréien oder déi de soziale Mindestloun verdéngen. Mä déi sozial Schwaach leien och nach fir eis do driwwer. Wann Dir haut eng Famill hutt mat zwee Kanner, déi 3.000 oder och nach 4.000 Euro de Mount verdéngt, déi fällt...

► **M. Camille Gira** (*déi gréng*).- ...an do ass bei enger Dreckschést vun 280 Euro d'Joer de Problem?

► **M. Gast Gibéryen** (*ADR*).- Jo, dat ass och fir déi Leit...

► **Une voix**.- Ass dat de Problem?

► **M. Gast Gibéryen** (*ADR*).- Och do ass eng Gemengentax...

(*Interruptions diverses*)

► **M. Camille Gira** (*déi gréng*).- 280 Euro d'Joer.

► **M. Gast Gibéryen** (*ADR*).- Och fir déi Leit ass eng Gemengentax vun...

► **M. Camille Gira** (*déi gréng*).- Dat ass Populismus.

► **M. Gast Gibéryen** (*ADR*).- Wann dat fir lech kee Problem ass...

► **M. Camille Gira** (*déi gréng*).- Dat ass Populismus, Här Gibéryen!

► **M. Gast Gibéryen** (*ADR*).- Gitt bei déi Leit, wa se d'Rechnung vun der Gemeng kréien! Fir déi Leit ass och eng Gemengerechnung, wa se déi kréien, vu 400, 500 Euro, wéi dat am Abléck bei villen de Fall ass, bei deene Leit ass dat och e Problem. Wann dat fir lech kee Problem ass; ech soen lech, fir déi Leit ass dat e Problem!

Eng Famill, déi 3.000, 4.000 Euro verdéngt a si huet zwee Kanner, fir déi ass all Euro e Problem, och wann déi gréng mengen, et wier kee Problem. Duerfir wëll ech lech soen, mir setzen eis fir déi sozial Schwaach an, an zwar fir all déi sozial Schwaach, an net als Alibi, wéi déi gréng, fir e puer Stéck!

► **M. le Président**.- Merci, dem Här Gibéryen. Elo kritt d'Wuert...

► **M. Félix Braz** (*déi gréng*).- CGFP-ADR.

► **M. le Président**.- ...den delegierten Nothaltekeetsminister, den Här Marco Schank.

► **M. Félix Braz** (*déi gréng*).- De Privatsektor, dat war fréier bei lech. Dat war fréier, dat ass laang hier!

► **M. Marco Schank**, *Ministre délégué au Développement durable et aux Infrastructures*.- Här President, Dir Dammen an Dir Hären, fir d'Éischt wollt ech och dem Kolleg Marcel Oberweis Merci soe fir deen ausféierleche Rapport, détailléiert, wéi mer dat och vun him gewinnt sinn.

Ech wollt als Éischt soen, an dofir sinn ech eigentlech ganz dankbar, datt dese Projet d'Resultat ass vun enger exzellenter Aarbecht, enger konstruktiver Diskussioun, virun allem an der Chamberskommissioun, wou laang a gutt diskutéiert ginn ass a wou mer eis mat alle Bedeelegten am Fong och - et ass gesot ginn - mat deenen Entrevuen, deene Visiten eigentlech konnten eens maachen, fir e gutt Gesetz ze maachen. Ech wënsche mer och herno, datt et breet gestëmmt gëtt, an et gesäit de Moment jo och esou aus.

Et ass awer och d'Resultat vun enger intensiver Virbereedung am Virfeld vun deem Gesetz, wou mir, d'Verwaltung, d'Ëmweltverwaltung an och de Ministère, fréi ugefaangen hunn. Enn 2010 waren déi éischt Workshops mat alle Vertrieder, all deenen, déi concernéiert waren, och dem ekonomesche Sektor.

Eng Rei spezifesch Réuniounen waren ënner anere och, selbstverständlech, mat der Gemeengesyndikater, an net fir d'Lescht och mam Syvicol. Ech selwer war bei där enger oder där anerer derbäi, wou mer - dat wëll ech och dem Syvicol soen - net manner wéi, ech mengen, et sinn der 27, jiddefalls iwwer 20 Proposen, Ureegungen iwwerholl hunn, wou mer gesot hunn, majo, dat do ass sënnavoll, dat kënnen mer am Virfeld, also laang am Virfeld an deem Gesetz zrëckbehalen.

Da wollt ech soen, datt selbstverständlech mer hei eng Direktiv ëmsetzen, wou mer och e bësselche Retard hunn. Dee Retard, deen ass awer och ze argumentéieren. Éischtens wollt mer, an Dir erënnert lech drun, datt ech dem Regierungsrot Ufank 2010 deen neien Offallwirtschaftsplan virgeluecht hunn, dee jo zum Deel dann och d'Basis gebilt huet, mat deene Mesuren, déi mer herno an d'Gesetz erageholl hunn, fir eben den Text auszeschaffen.

An anerersäits hunn déi preliminar Consultatiounen natierlech eng Zäit gedauert. Wann



een am Virfeld mat jiddwerengem wëllt schwätzen, jiddwerengem wëllt nolauschteren, da brauch dat och Zäit. An dat hu mer ganz bewusst gemaach. An ech mengen, dat ass och an der Chamberskommissioun gutt erauskomm, datt vun alle Säite gesot ginn ass, majo, d'Preparatioun war gutt an och d'Diskussionen, fir ee Gesetz ze maachen, déi konnte positiv ofgeschloss ginn.

Vläicht een Ennerscheid vis-à-vis vun der Direktiv, wou mer d'Direktiv net 1:1 konnten ëmsetzen, ass, datt mer wollten de contaminéierte Buedem an den Offallbegrëff vum Gesetz mat eranhuelen, well dat u sech net virgesi war. D'Direktiv, also d'Offalldirektiv ass entstanen zu enger Zäit, wou och d'Europäesch Kommissioun eng Buedenschutzdirektiv preparéiert huet, déi awer ni ukomm ass a wou et och elo esou ausgesäit, wéi wann dat nach esou bal net géif kommen. Duerfir hu mer gesot, mir wëllen net, datt hei ee Vide juridique entsteet.

An duerfir hu mer an dat Offallgesetz dann och dee Begrëff - an dat ass ee wichtege Begrëff -, vum contaminéierte Buedem mat erageholl an den Offallbegrëff. Déi illegal Deponie Biissen ass virdru schonn ernimmt ginn, an ech mengen, datt dat Beispill gutt weist, datt esou e Buedenschutzgesetz wichteg ass. A mir sinn amgaang, um Niveau vum Ministère a virun allem vun der Verwaltung un esou engem Gesetz ze schaffen.

Mir hunn dat och an der Regierungserklärung gesot gehat, datt mer dat wëlle maachen. An ech wëll awer och soen, datt mer net Biissen ofgewaart hunn, ier mer eis un déi Aarbecht gemaach hunn: engersäits d'Buedenschutzgesetz an anerersäits och, datt mer eng Partie potenziell Siten - mir hunn eng Lëscht vu knapps 40 Siten -, wou mer no an no kucken, wou mer mengen, datt et do am wichtigste wier, fir unzesetzen, fir dann déi Siten no an no ze sanéieren. Dat kascht natierlech vill Suen. Dat kascht vill Aarbecht. Nach muss déi Aarbecht gemaach ginn, an déi hu mer eis virgeholl zënter enger Rei vu Méint, also am Fong vun Ufank un, datt ech déi Responsabilitéit iwwerholl hunn.

Da wollt ech soen, déi nei Offalldirektiv fixéiert de Kader ganz kloer, engersäits en héijen Niveau vum Ëmweltschutz um Niveau vun eisen Offall ze erreechen. An da vläicht dee wesentlechten Aspekt, dat ass deen, fir responsabel an nohalteg mat eise Ressourcen ëmzegoen. Et ass virdru scho vun deem neie Kollege Deputéierte gesot ginn, datt mer amgaang sinn eigentlech d'Ressourcen ze verbrauchen, an am Fong amgaang sinn eise Planéit auszeraiberen. A wann ech lech déi Zuelen eng Kéier soen, datt mer haut iwwer 60 Milliarden Tonne Ressourcen aus eisem Ökosystem eraushuelen: Dat si Mineralien, dat si Metaller, dat ass Biomass, dat si fossil Energieträger. Dat waren 1980 nach nëmme 40 Milliarden Tonnen.

Wa mer esou virufuere wéi bis elo, business as usual, da si mer 2030 bei net manner wéi 100, bei iwwer 100 Milliarden Tonne Ressourcen, déi mer aus eisem Planéit wierklech ausraiberen! An dat muss mer évitéieren. An do kënnt d'Ëmsetzung vun der Direktiv an eist neit Offallgesetz genau op deem richtegen Moment, fir och do ze hëllefen, Ressourcen ze schounen. Ech soen herno nach ee Wuert dozou.

D'Gesetz gëtt, grad wéi d'Direktiv, eng Partie Prinzipië vir. Aus deene Prinzipië loosse sech Resultater erauszéien. Vun deenen Taux de recyclage, déi déi Direktiv an d'Gesetz virginn, ass virdru scho geschwat ginn. Ech brauch dat net ze widderhuelen.

Ech wëll awer derbäisoen, datt mer bei deem neie Gesetzestext op d'Acquisé vun der Vergaangenheet gesat hunn, well Lëtzebuerg - an dat ass och e puermol vu verschiddenen Interventioné gesot ginn - am Beräich vun dem Recyclinge wierklech Virreider ass an Europa. An dat ass gutt esou. Op déi gutt Resultater wëlle mer opbauen, an dat neit Gesetz gëtt eis déi Méiglechkeet, fir verstärkt dorop opzebauen.

Loosst mech just eppes zur Hierarchie soen! Fënnf Stufen: Preventioun; dann d'Virbereedung fir de Réemploi; de Recyclinge; dann all aner Verwäertung, also och energetesch Valoriséierung; an dann zum Schluss nach just esou mann wéi méiglech ze eliminéieren. Dat ass de Prinzip.

Och d'Vemeidung ass ervirgehuewe ginn haut de Mëtteg. Dat ass gutt esou. Vläicht och dozou ee Saz. Mir hunn natierlech weineg Mainmise hei zu Lëtzebuerg, fir op d'Verpackunge vun de Produiten anzewierken insgesamt. Nach kënne mer awer probéieren, d'Verhale vun den Offallproduzenten, vun de Konsumentinnen a Konsumenten, dorop kënne mer awierken.

Grad an deem Beräich huet d'Ëmweltdepartement an d'Verwaltung an deene leschte Joren eng ganz Partie Mesurë geholl. Ech wëll just zwee oder dräi Beispiller soen.

Zënter 2004 huet d'Ëmweltdepartement en Accord mat der Valorlux fir den Handel, fir keng

Eeweekafstute méi ze gebrauchen. Dat si virun allem d'Supermarchéen, awer och neierdénge d'Metzler, d'Bäcker an esou weider. An d'Verwaltung geet dovunner aus, datt mat dëser Moosnam bis elo ronn 100 Milliounen Plastiktute konnten évitéiert ginn!

Dann huet d'Verwaltung mam Ökozentrum am Kulturjoer fir grouss Evenementer ee Pilotprojet duerchgefouert, fir keng Eewebecheren, mä Pfandbecheren ze benotzen. Doraus ass eng kommerziell Aktivitéit entstan.

An dann huet awer och d'Stad Lëtzebuerg zum Beispill d'lescht Joer am Kader vum „Summer in the city“ nëmmen nach Méiwebecheren ugebueden. Och dat ass ee flott Beispill. An e lescht vläicht, d'Kulturfabrik vun Esch, déi e ganzt Konzept mam Ökozentrum op d'Bee gesat huet, fir nohalteg Fester ze feieren.

Da vläicht nach eng Aktioun, déi eis, mengen ech, alleguerter gutt gefält, dat ass d'Aktioun „clever akafen“, déi et scho laang gëtt, vun der SuperDrecksKëscht, wat d'Promotioun vu Produiten, déi offallvermeidend wierken, ubelaangt. An och d'SuperDrecksKëscht fir Betriber, wann een dee Qualitéitslabel wëllt kréien als Betrib, deen do matmécht, do ass och eng wesentlech Komponent déi vun der Vermeidung vun Offall.

Da vläicht dee wesentlechten Aspekt, deen och zwee-, dräimol haut ernimmt ginn ass, dat ass deen, datt d'Gesetz Weeër opweist. D'Gesetz weist Weeër op, fir d'Ziler ze erreechen, garantiéiert awer déi noutwendeg Flexibilitéit, déi ee brauch - Stéchwuert: Autonomie communale -, fir de Gemengen, de Gemengesyndikater ze erlaben, déi Ziler op hir Aart a Weis ze erreechen.

Et ass mir am Endeffekt egal - mir schwätze vun Obligation de résultat -, et ass mir egal, wéi déi Ziler erreecht ginn. Si müssen erreecht ginn. Wéi eng Gemeng oder e Gemengesyndikat dat am Endeffekt mécht, ass manner relevant. Déi eng, déi weien; anerer zielen, wéi oft datt eidel gemaach gëtt; anerer maachen eng Kombinatioun dovunner; anerer hu verschidde Gréissten oder Volumë vun DrecksKëschten. Alles dat ass richtig. An duerfir ass et, mengen ech, e wesentleche Prinzip vun der Offallwirtschaft.

Da kommen ech bei dee Punkt, dee jo och e bësse fir Diskussiounen gesuergt huet, dat ass dee vum Pollueur-payeur. Et gëtt jo deelweis gefaart, datt duerch dëse Prinzip den Offall fir d'Biergerinnen an d'Bierger géif méi deier ginn, mer eng ähnlech Diskussioun wéi beim Waasser kréien, an et huet een dat a verschiddenen Avisé kënne liesen. An ech hunn et och an der Press notamment, op där enger oder anerer Plaz, kënne déi lescht Deeg noliesen.

Dozou wëll ech zwou Saache soen. Dat Éischt ass dat, datt d'Aféierung vum Prinzip Pollueur-payeur jo näischt Neies ass. Zënter dem Gesetz vu 1994 ass dee Prinzip virgesinn, et ass also näischt Neies. An eng Rei vu Gemengen, fir net ze soen, ganz vill Gemengen hunn och dee Prinzip ëmgasat. Et kann ee feststellen, datt d'Moyenne vun den Taxen, déi den eenzelne Bierger ze bezuelen huet, net eropgaangen ass, mä souguer éischer erofgaangen ass! Mir hunn dat extra nach eng Kéier, ech hunn dat extra nach eng Kéier vun der Verwaltung nokucke gelooss, fir dat och esou kënne hei ze soen.

Dat kënnt dohier, well d'Biergerinnen an d'Bierger sech aktiv mat abrénge an sech un der Reduktioun vu Reschtoffall bedeelegen oder an hire Recycling-Center ginn, dat heescht, op déi eng oder déi aner Manéier un eng Verwärtungsschinn dann eruginn.

Kloer ass, datt, wa keng Efforté gemaach gi vun deem Eenzelnen, fir Offall ze reduzéieren, da selbstverständlech ee muss méi bezuelen. Mä dat ass de Prinzip. An ähnlech positiv Erfahrungen, wéi mir se gemaach hu mat deem Prinzip Pollueur-payeur, dee mer zënter 1994 hunn, sinn och am Ausland gemaach ginn. An den Zweck vun deem Prinzip ass jo deen, fir entsprechend Ureizer ze schafen, fir eng Verhalsännerung dann och erbäizeféieren.

Dat Zweet, wat ech wollt soen, och am Laf vun den Diskussiounen - dat ass ähnlech wéi beim Waassergesetz - ass awer och d'Chamber higaangen an huet een Amendement ugeholl, fir de Gemengen d'Méiglechkeet ze ginn, a sozialen Härtefäll iwwert d'Allocation de vie chère am Offallberäich och d'Präisdeierechten auszgläichen.

Här President, mir hunn hei zu Lëtzebuerg eng Offallwirtschaft, déi sech am internationale Vergläich net brauch ze verstoppen. Ganz am Géigendeel! Et kann ee souguer soen, datt mer top sinn an deem Beräich, dat ass och ugeklongen de Mëtteg. Eis Recyclingstauxë fir Hausoffall, déi mer bis elo erreecht hunn, gëllen ënnert deene beschten hei an der Europäescher Unioun, och wa mer nach vill ze dinn hunn.

Nach wëll ech awer drop hiweisen, datt beispillsweis iwwert d'Halschent vun eiser Popula-

tioun an der Tëschenzäit d'Méiglechkeet huet, fir organesch Kichenoffall an enger separater Asammlung ofzeginn. Beim Gréngschnëtt läit den Taux bei iwwer 90%. Iwwert d'Halschent vun de Batterien, déi zu Lëtzebuerg verkaaft ginn, ginn nees agesammelt a recycléiert. Beim Elektroschrott sinn et pro Awunner knapps zéng Kilo, wat dat duebelt ass, wat déi europäesch Obligatione sinn. A bei de Verpackunge si mer ëmmerhi bei engem Verwärtungstaux vun iwwer 90%, Gewichtsprozent.

Da wollt ech nach ee Saz och soen zur SuperDrecksKëscht, well dës Aktioun och an den Avisen ëmmer erëm als positiv an explizit ernimmt ginn ass, ënner anerem vun der Chambre des Métiers, Chambre de Commerce. Se ass och vun der Europäescher Kommissioun als best practice agestuft ginn. An an der Tëschenzäit ass dee Modell an och déi Philosophie vun der SuperDrecksKëscht exportéiert ginn: Stied wéi Stockholm oder och Regiounen an der Schwäiz oder an Ungarn hunn dee Modell, wann een esou wëllt, adoptéiert an et kann een am Fong och hei vun enger reglechter Success Story schwätzen.

Dann an deem Kontext och nach de Bou gemaach zur Simplification administrative, wat och ee wesentleche Volet vun deem Gesetz sollt sinn. An dat ass esou, datt mer higaange sinn an iwwert d'Verwaltung e System ausgeschafft hunn, datt d'Betriber d'Méiglechkeet hunn, iwwer hir Joresbilanzen informatesch als Plan de gestion, als Plan de prévention viruzeginn. Dann huet awer och e Regruppéiere vu Genehmigungsprozeduren dozou gefouert, datt mer eng Vereinfachung do fäerdegréngen. Dat Zweet ass, datt vill Aktivitéiten net méi musse genehmegt ginn, mä einfach enregistriert ginn. An dat Drëtt ass, datt mer fest Délaïen an d'Gesetz ageschriwwen hunn.

Da wollt ech och an engem Saz soen, datt ech selbstverständlech dee Kooperatiounsprojet vu SIDOR, SIGRE a SIDEC ganz staark begreissen; an net nëmme begreissen, ech wäert och bei der Ëmsetzung eng Hand upaken. Den 3. Oktober hunn déi dräi Syndikater an Délibérations concordantes sech zu deem Schratt, wat ee ganz wichtegen ass fir d'Offallwirtschaft hei zu Lëtzebuerg, decidéiert.

Zum Schluss, mat dësem Gesetz kréie mer net nëmmen en neien Text, fir d'Offallwirtschaft besser ze reglementéieren, mir kréie manner Offall insgesamt, dee mer produzéieren, mir kréie manner Offall, dee muss op d'Déchargé kommen, dee muss verbrannt ginn. Mir rutschen am Fong staark an eng Société de recyclage eran, eppes, wat d'Europäesch Kommissioun wëllt via d'Direktiv.

A virun allem, wat mer an Zukunft brauchen, ass, datt mer, ech hunn et virdru schonn uge-deit, ee responsabelen, nohaltegen Ëmgang mat deene liebensnoutwendegen Ressourcë fäerdegréngen, déi op dësem Planéit net onendlech sinn.

Vläicht nach ee Saz zu de Froen. Déi, déi virdru gestallt ginn ass vum honorabele Roger Negri am Kontext mat der SIDEC-Deponie. Duerch déi Kooperatioun, déi ech elo grad erwähnt hunn, ass et méiglech, datt deen Tipp kann, ech soen emol 2014, 2015 ophéieren. Et läit eng Genehmigung vir bis 2015. Reng technesch vun de Capacitéiten hier denken ech, datt deen Tipp nach bis 2025 zirka kéint fonctionnéieren, mä dat wäert dann an der Realitéit net néideg sinn.

Da wollt ech op déi Fro äntwerte vum Marcel Oberweis bei dem Kontext Bauschutt. Do ass et esou, datt mer, wa mer allgemeng de Bauschutt kucken, also Buedem an Ofbrochmaterial, da si mer bei engem Taux vu ronn 45%; wa mer reng Ofbrochbauschutt kucken, ouni Buedem, bei engem Taux vu knapp 70%. Alles, wat Fiels, Steing ass, kann ee selbstverständlech perfekt recycléieren.

An ech wollt och nach soen, datt och de Ministère, an net eréischt zënter Biissen, well dat virdru gesot ginn ass, eng Démarche geholl huet, fir déi problematesch Siten hei am Land no an no ze sanéieren.

Dat gesot, freeën ech mech, datt dëse Projet de loi eng breet Zoustëmmung de Mëtten hei fënnt an ech soen lech Merci fir d'Nolauschteren.

► **Plusieurs voix.** - Très bien!

► **M. le Président.** - An ech soen dem Minister Marco Schank Merci.

Domadder si mer um Enn vun eiser Diskussioun a mir kommen elo zur Ofstëmmung iwwert de Projet de loi.

Vote sur l'ensemble du projet de loi 6288 et dispense du second vote constitutionnel

D'Ofstëmmen fänkt un. Fir d'Éischt déi perséinlech Stëmmen. De Vote par procuration. De Vote ass ofgeschloss.

De Projet de loi 6288 ass ugeholl mat 53 Jo-Stëmmen, géint 5 Nee-Stëmmen.

Résultat définitif après redressement: le projet de loi 6288 est adopté par 55 voix pour et 5 voix contre.

Ont voté oui: Mmes Diane Adehm, Sylvie Andrich-Duval, Nancy Arendt, MM. Fernand Boden, Lucien Clement, Mme Christine Doerner, MM. Emile Eicher, Félix Eischen, Mme Marie-Josée Frank, MM. Léon Gloden, Norbert Haupt, Ali Kaes, Marc Lies (par M. Raymond Weydert), Mme Martine Mergen (par M. Lucien Clement), MM. Paul-Henri Meyers, Laurent Mosar, Marcel Oberweis, Gilles Roth, Jean-Paul Schaaf, Mme Tessy Scholtes, MM. Marc Spautz, Robert Weber (par M. Jean-Paul Schaaf), Lucien Weiler (par Mme Sylvie Andrich-Duval), Raymond Weydert, Serge Wilmes et Michel Wolter;

MM. Marc Angel, Alex Bodry, Mme Claudia Dall'Agnol, MM. Fernand Diederich, Georges Engel (par M. Ben Scheuer), Ben Fayot, Claude Haagen, Jean-Pierre Klein, Lucien Lux, Mme Lydia Mutsch, MM. Roger Negri, Ben Scheuer et Mme Vera Spautz;

MM. André Bauler, Eugène Berger, Xavier Bettel (par M. Fernand Etgen), Mme Anne Brasseur (par M. Carlo Wagner), MM. Fernand Etgen, Paul Helming, Claude Meisch, Mme Lydie Polfer (par M. André Bauler) et M. Carlo Wagner;

MM. Claude Adam, François Bausch (par Mme Viviane Loschetter), Félix Braz, Camille Gira, Henri Kox, Mmes Josée Lorsché et Viviane Loschetter.

Ont voté non: MM. Jean Colombero, Gast Gibéryen, Jacques-Yves Henckes et Fernand Kartheiser;

M. Serge Urbany.

Gëtt d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

Domadder si mer um Enn vun eiser Sitzung ukomm. D'Chamber kënnt muer nees um zwou Auer... Ah, entschëllegt, den Här Kox freet nach d'Wuert, fir eng Motioun ze déposéieren.

7. Dépôt d'une motion par M. Henri Kox

Exposé

► **M. Henri Kox (déi gréng).** - Merci, Här President. Et ass eng Motioun, déi ech am Numm vu sämtleche Sensibilités politiques hei am Haus wëllt déposéieren. Et geet ëm d'Atomkraftwierk Cattenom, awer net nëmmen ëm d'Atomkraftwierk Cattenom.

Dir wësst, an engem Mount ass et net grad ee Joer hier oder ass et ee Joer hier wou zu Fukushima en Atomreakter explodéiert ass, nodeems eng schrecklech Naturkatastroph sech ereignet huet. Doropshi sinn op europäischem Plang Stresstester fir déi sämtlech Atomreakteren an der Europäescher Kommissioun ugelaft, ënner anerem och iwwer Cattenom.

Mëttlerweile hate mer d'Geleeënheet, an enger gemeinsamer Sitzung den 19. Januar 2012 vun der Santéskommissioun, der Affaires intérieures a Grande Région souwéi och der Développement-durable-Kommissioun den onofhängegen Expert Dieter Majer, dee vun den dräi Regierungen Lëtzebuerg, Saarland a Rheinland-Pfalz agesat gouf, deen eis hei en ernüchternde Rapport iwwer Cattenom gemaach huet, iwwert den Zwëschebericht vun deem Stresstest, wou eng ganz Rei Defiziter ernimmt goufen, ënner anerem d'elektresch Noutstromwaasserversuergung fir d'Killung.

Insbesondere och Defiziter, déi bei engem méiglechen Aerdbeewe kënne entstehen, insbesondere iwwert deem eraus, wat Cattenom virgesinn huet. Och de Crash, de Fliegercrash ass absolut net an deem Stresstest bis elo ënnersicht ginn.

All déi Faiten, déi hei opgeworf ginn, hunn eis zum Schluss bruecht, dass mer effektiv keng Verlängerung vu Cattenom méi kënne akzeptéieren.

Dofir fuerdere mer d'Regierung op, an enger gemeinsamer Motioun, wéi gesot, déi och vun de Regierungsmembere scho gesi ginn ass an och Ënnerstützung fënnt, nodeems mer de 7. Abrëll 2011 schonn eng Motioun hei ugeholl hunn, fir Cattenom entsprechend kenger Lafzäitverlängerung zouzestëmmen, verlaange mer, dass déi Defiziter, déi de Moment bekannt sinn, sou schnell wéi méiglech dann awer reparéiert ginn oder sou gutt wéi méiglech an d'Rei